

IGNOTORVM

Atque obscurorum quorundam

DEORVM


ARÆ,

Nunc primum in lucem datæ,
notisque illustratæ,

Studio IACOBI SPONII, Med.

Doct. Collegio Medicorum

Lugdunens. aggregati.




L V G D V N I,

Typis IACOBI FAETON

M. DC. LXXVI.

Cum Superiorum permissu.





ANTIQUITATIS

Studiofissimo, mihique
amicitiæ jure coniun-
ctissimo, D. GEORGIO
VVHELER, Nobili
Anglo,

IACOBVS SPONIUS
salutem.

IGNOTI Dei aram, quæ
olim Divo Paulo oratio-
nis ad Areopagum materiam sup-
peditavit, frustra à nobis Athe-
nis quæsitam nosti, Vir amicissi-
me, nec quidem ullam recentem
inscriptionem ad illius imitatio-
nem, ut nobis imponere voluit
recens Athenarum descriptor, per-
suasus fortè à Seldeno, qui libro de

*Dys Syris, supposititiam istam
obtrudit, quasi Athenis extaret:
ΘΕΟΙΣ ΑΣΙΑΣ ΚΑΙ ΕΥΡΩΠΗΣ ΚΑΙ
ΛΙΒΥΗΣ ΘΕΩΙ ΑΓΝΩΣΤΩΙ ΚΑΙ ΞΕ-
ΝΩΙ. Id est, Deis Asiæ & Europæ
& Libyæ, Deo ignoto & pere-
grino. Purum putum figmentum.
Verum illius loco, ut te Athenis re-
ducem insolito aliquo xenio ex-
cipiam, ex Deorum aliquot per
orbem cultorum Aras, nobis qui-
dem fere ignotorum, cultoribus
verò apprimè cognitorum, cum
è contra Atheniensibus ignotus
Deus ille esset, quem ipsis prædi-
cabat Apostolus.*

*Nullus autem dubito, quin
hac Antiquitatis veneranda mo-
nimenta libenter sis accepturus,
cum alia eiusdem generis invi-
sendi & inquirendi causâ, mecum
Græciæ peregrinationem suscepe-
ris, longam, difficilem, periculo-
sam. Non dixerim fastidiosam,
siquidem*

siquidem itineris molestias exi-
mebant, plus quàm quater cen-
tum Græcæ inscriptiones nobis de-
tectæ perlustratæque. Meministi-
ne, Vir amicissime, quantâ cum
voluptate ingentem illum Sarco-
phagum Thyatiræ observabamus,
quantâque solitudine nos affi-
ciebat ille Turca, qui vel simula-
tione vel superstitione quâdam,
prohibere volebat quominus in-
sculptum epitaphium describere-
mus. Quæ etiam perfusi lætitiâ,
& alacritate locos illos celebres,
nunc ferè tantum nomina lustra-
bamus, Delum, Trojam, Ephe-
sum, Delphosque in suis ruderi-
bus semi-sepulta. Tandem labori-
bus nostris finem faciamus, con-
tenti in musæo peregrinari, mo-
do cum Oleario Persidem obam-
bulantes, modo cum Busbekio
Turciam percurrentes, modo cum
Bellonio Egyptum petentes, mox

que Schedas nostras revolvētes.
 Interea dum ad tuos perveneris,
 habes hīc quòd mediteris; quod
 si omnia assequi non possis, illud
 tamen capias quæso, me tibi Ami-
 citiæ obsequiūve symbolam libens
 animo dedicasse. Γάσκε, μάπαμε, δὲ
 Θεὸς γὰρ δώσῃ, γὰρ πάντα καλᾶ εἰς τὸν
 τίπιν σε, καὶ γὰρ εἶσαι πλούχιον.

Lugduni, prīdie Idus
 Septembr. 1676.






M O N I T V M

ad Lectorem.



ON ea mihi mens fuit, candide Lector, vt Deos omnes ignotos, obscurisve cognominibus insignitos hic infererem. Aliàs apud Gruterum eorum turbam offendifsem, Bacurdum, Corniscam, Endovelicum, Latobium, Vosegum, Sebethum, Surgasteum, Iovem Eiazium, Ladicum, Saranicum & Dolichenum, Martem Britovium, Ciradinum & Leucetium, Mercurium Arcetium, Artaium aliosque quamplures. Verùm id potius cogitavi ex his quæ in ipsius thesauro desiderantur ostendere quantum spicilegium nobis adhuc reliquerit: Siquidem ex solo Deorum titulo, atque ex eis solum quorum ignota obscurave fama, non parvum numerum proferre possum, intra aliquot annos qui-

bus huic collectioni Gruteriani
 supplemēti animum applicui. Col-
 legerat certè vt audij inscriptionū
 sex millia Doctissimus Reinesius,
 easq; nunc in lucē prodituras spe-
 ramus. Ter mille I. Baptista Do-
 nius Florentinus, mille Peireskius,
 bis mille Cardinalis Barberinus,
 & totidem Vir magnæ eruditio-
 nis Nicolaus Heinsius : ego qui
 inter eos strepo velut anser inter
 olores, Latinas saltem ter mille,
 Græcas sexcentas. Vnde conjici
 facile potest ex iis eiusdem atque
 Gruterū molis emersurum esse vo-
 lumen. Hæc te volebam, Lector,
 nescius ne abires. Vale.



9
Genevæ.

Ara prope fluvium Arvam effossa.

I. Iovis Cingidui.

IOVI O. M.
CINGIDVO
STABVLO ET
AVLV S

*Ab Iove principium , Musæ,
Iovis omnia plena. Plena scilicet
eius delubris , aris, statuisque:
subque variis cognominibus cole-
batur Iupiter Optimus Maximus,
pro variis locis ubi eius cultus pe-
culiariter vigeat , proque diver-
sis*

sis beneficiis quæ mortalibus concedi ab ipso credebant gentes superstitionibus deditissimæ. Sic Iovis Tonantis , Fulguratoris , Custodis , Statoris , Capitolini epigrammata passim videre est in antiquis monumentis. Sed quid sibi velit insolens istud epitheton , Iovis optimi maximi *Cingidui* , cui *Stabulo & Aulus* aram dedicaverant , assequi perarduum. Est quidem pagus , Genève horis distans non amplius quinque *Gingin* vocitatus , à quo quidem derivari posset , si modo de nominis illius loci antiquitate constaret. An verò potius Iupiter Genève cultus *Cingidnus* dictus esset à *eingentibus* eā urbem montibus circumvicinis. Sed leves nimium conjecturæ , ignotique Dei primum occupet locum , donec solertior aliquis eum divinarit. Depravata cæterum hæc inscriptio apud Guichenon , typographorum forte vitio. Sic enim ibi legitur *Iovi O. M. Cingi duo & Aulus* , divisa scilicet hac

Histor.
Sabaud.

hac voce *Cingiduo* & sequenti *Stabulo* omiffa.

II. Iovis Taranuci.

Sibenici in Dalmatia.



Nec faciliùs Iovem istum in Dalmatia cultum, barbaroque nomine *Taranucum* indigitatum cognoscere valebimus, cui *Arria Successa* nobis non minùs ignota votum solvebat. Sic ergo cum Iove suo valeat, nòsque ad alia properare

properare concedat, animo revol-
ventes quod appositè dixit Arno-
bius contra Gentes, *Tot esse mon-
stra quot Iovis nomina.*

III. Iovis Fagutalis.

*Romæ, fragmentum in horto
S. Sylvestri.*

.....AVGVST. VICI IOVIS
F A G V T A L.
..IMP. NERVA DIVI NERVAE
T R A I A N O
....ICO PONT. MAX. TRIB.
P O T. XIII. IMP. VI.
....POLLIONIS TRIB. PLEB.
AED. REG. III. VETVSTAT.
... GISTRI ANNI CXXI. SVA
I M P E N S A R E S T I T V ...
....PHOEBVS A. NONIVS
A. L. O N E S I M V S
....CALLISTVS L. VALERIVS
E V T I C H V S.

Fagutalis Iovis sacellum à Fagu
arbore ipsi sacrâ, quæ intus serva-
batur à Festo, Varrone, Plinióque
memoratum est: sed ideo omittere
visum

visum non est , quod in aliis antiquis marmoribus non occurrat. Statuitur autē à Publio Victore in quinta vrbis regione, nō autem in decima vt habet Rosinus , delubrum istud. Hæc autem inscriptio sculpta fuit, in alicujus ædificij restorationis memoriam ; Trajano Augusto imperante Tribunitiæque potestate decimum tertium gaudente , à quartumviris sub finem memoratis.

I V. Iovis pecoralis.

In insula Naxo

Supra montem , ad ingressum cryptæ scriptum.

Ο Ρ Ο Σ

Δ Ι Ο Σ Μ Η Λ Ω Σ Ι Ο Υ.

Id est


Mons

Iovis pecoralis.

Excellentissimus D. Marchio
B

de Nointel , Regis Christianissimi
ad Turcarum Monarcham Lega-
tus , insulas Archipelagi perlu-
strans pervenit ad *Naxon* nunc
Naxia vocatam , vbi montem in-
sulæ eminentiorem conscendens,
in vertice repperit cryptam à natu-
ra in rupe cavatam , in cuius in-
gressu superscripta erat hæc inscri-
ptio ΟΡΟΣ ΔΙΟΣ ΜΗΛΩΣΙΟΥ,
quam explicavit *Mons Iovis pecc-*
ralis : μῆλα enim *Homero* , *pecora*
seu *oves* dicuntur & μῆλων
ovium pastor, *Hesychio* : Sed quam
ob rationem insulsi illi *Naxiotæ*
Iovi suo pecorum custodiam com-
miserint ignorare me fateor , quid
enim Iovi cum ove ? An fortè
quod is infans caprarum lacte nu-
tritrus esset , capras postea in pro-
tectione sua habere voluerit ? Illæ
enim sub pecorum genere com-
prehensæ. *Naxos* certè omnige-
nis pecudibus producendis alen-
disque feracissima est , non minùs
quàm generosissimis vinis , vnde
in ea insula *Bacchi* tumultum fuisse
fama fuit & superest. Arcum
enim

enim quendam marmoreum inibi
 extantem Bacchi sepulchrū nunc
 vocant. Cæterum ut etiam ali-
 quid animi gratia subiungamus,
 prædictus D. Legatus, qui mihi
 id communicare dignatus est, pro-
 fundam hanc cryptam subire au-
 sus, eam mirificis naturæ operi-
 bus ornatam repperit, stupendis-
 que aquæ congelationibus, lapi-
 deisque stillicidiis, & paulò intus
 sculpta Græcorum antiquorum no-
 mina, qui illam subintraverant,
 non quidem in intimos ejus re-
 cessus, uti prædictus D. Legatus,
 qui ibi duos dies commoratus,
 eam nova inscriptione Christo
 consecrauit, ejusque elegantem
 descriptionem Regi Christianissi-
 mo transmisit.



V. Iovis Sereni , &c.

Romæ.

I. S. I. P. D. M.

ISIDI SALVTARI

PRO SALVTE Q. VERGILII

MODESTI CASSIA MAT.

Mater.

V. S. D.

Hosce obscuros primæ lineæ characteres , quorum ignoratione ignota fingeremus numina , exposnebat Vir Doctissimus & in Antiquis versatissimus *D. Io. Petrus Bellori* Summi Pontificis antiquarius , hoc pacto *Iovi Sereno Iunoni Placidæ Diis Magnis* , quorum cognominum Iovis & Iunonis alia expromere exempla facile esset.

VI. Iunonis B. Opitulantis.

Nemausi, apud Guyranum.

L. ET INNONI B. OP.

IMPER. PONI

NEMAVSENSSES.

Hanc verò eruditus *Guyranus* excussit, in literis ad me datis, *Liber* Et *Iunoni Bene Opitulanti* imperarunt poni *Nemausenses*: ubi *Innoni* pro *Iunoni* fabrili mendo sculptum esse contendit. *Liber* autem sive *Bacchus* à *Nemausensibus* colebatur, ob generosissimas vineas, quibus regio abundat, *Iuno* verò *bene opitulans*, alia non est quàm *Iuno Lucina*, quæ parturientibus opitulabatur: nec malè conueniunt *Liber* & bona *Iuno*, utrique enim communia sacra fiebant.

Æneid.
4.v.738.

VII. Quadribis.

*In ruinis Carnunti , prope Viennam
Austriae pago Pedernel , recens ef-
fossa. Ex D. Mayer Lugd.*

S I L V A N A B. E T
Q V A D R I B I S A V G. S A C R V M
C. A N T O N I V S V A L E N T I N V S
V E T. L E G. X I I I. G. M V R V M
A F V N D A M E N T I S C V M
S V O I N T R O I T O E T P O R T I C V M
C V M A C C V B I T O V E T V S T A T E
C O N L A B S V M I M P E N D I O
S V O R E S T I T V I T
G E N T I A N O E T B A S S O
G O S.

Silvanæ Faunæque Sylvarum
Præsides Deæ , quæ & Dryades &
Hamadryades aliis dictæ , nescio
quæ monstra hic habeant sociata:
an seminumina quadriiis præsi-
dentia,

dentia, quales in viis biviisque
 Hermi seu Mercurij ab antiquis
 culti. Quo cæterum tempore hoc
 epigramma posuerit *Caius Anto-*
ninus Valentinus veteranus legionis
decime quarta gemine, patet ex
 consulatu notato *Gentiani & Bassi*,
 qui in annum urbis conditæ 963.
 incidit, partusque virginei 210.
Silvanarum autem mentio elegan-
 tem inscriptionem mihi in men-
 tem revocat, ab Grutero ignora-
 tam, ut & cætera quæ à nobis hîc
 exhibêtur. Hancque mihi commu-
 nicavit R.P. *Ruffinus* Franciscanus, Histor.
 à *Guichenone* etiam citatam. Saba.

**In vrbe Aixme Tarantasiæ,
 in Alpibus.**

*Silvane sacra semicluse fraxino,
 Et huius alti summe custos herculi.
 Tibi hæc grates dedicamus mu-*
sicas.

Quod nos per arva pèrque montis Montis
alpicos pro mō-

Tuique luci suaveolentis hospites,
Dum ius gubernò, rêmque fungor Ca-
sarum tes.

*Tuo favore prosperanti sospitas
 Tu me meosq; reduces Romam sistito,
 Daque Itala rura te colamus præsides.
 Ego iam dicabo mille magnas arbores.
 T. Pomponi Victoris Proc.
 Augusto.*

VIII. Siluan. Caminesis.

Roma in villa Duca Cesarini.

M. ANTON. BATES
 VALERIA PROFUTURA
 ET MARCVS ANTONIVS
 HYMETVS COM. FILIS SVIS
 DONVM DEDIT SANCTO
 SILVANO CAMINESI
 CLODIO ALEXANDRI
 MANCIPE CASSIA DEUTERA

Quale sit cognomen istud *Camineji*, Silvano attributum fari nequeo, cum neque officium, neque que locus, neque aliud mihi in mentem veniat à quo derivari videatur.

I X. Silvani Flaviorum.

*Extra Romam , in vinea prope
Turrim vulgò de Pignatara.*

SILVANO FLAVIORVM
CASSIANVS T. FLAVI AVG.
LIB. CELADI LIBERTVS
FECIT VNA CVM FLAVIS
CASSIANO ET AMANDO
FIL^IS INCHOATA
ANTONINO AVG. PIO P.P
DEDICATA XV. K. APRIL.
SCIPIONE ORPHITO ET
SOSIO PRISCO COS.

Silvanum familiæ suæ hic ve-
nerantur Flavij tres , pater & filij.
Mirum est Ethnicos tot Deos co-
luisse , sed mirum magis unum ex
iis numinibus in tot adhuc Deos
distraxisse, quot erant templa, aut
aræ iis dicatæ. Corrigit verò hæc
inscriptio

inscriptio Fastos Capitolinos, qui
statuunt sub Antonino hunc Con-
sulatum his verbis, *Ser. Cornelius*
Scipio Orfitus & Q. Nonius Prif-
cus, ubi loco *Nony*, repone ex la-
pide *Sosij*.

X. Dei Penini.

In Magno monte Divi Bernardi,
basis columnæ.

LVCIVS LVCILIVS
DEO PENINO
OPTIMO
MAXIMO
DONVM DEDIT.

Pennini Dei sive Penni qui in
Alpium

Alpium vertice colebatur , mentio
 est apud Titum Livium , sed *Peni-*
ni legendum ex hac inscriptione
 constat. *Pen* autem à quo *Penini*
 cognomen Celtica Lingua , rei
 cuiusque summitas & caput intel-
 ligebatur , vnde Alpibus nomen,
 quæ Germanicâ linguâ *Alpen* vo-
 cântur , & *Apenninis* qui Italiam
 in longitudinem percurrunt , ob
 eorum scilicet montium cacumi-
 na. Hinc etiam *Penna* vicus in edi-
 to colle Dienfis agri , & non lon-
 ge à Massilia *Penes* pagus pariter
 supra collem , ubi quædam anti-
 quitatis monumenta videbantur,
 de quibus plura *Boëssius* in miscel-
 lis. Inde nomen huic Deo qui in
 his montium verticibus coleba-
 tur , sub habitu iuvenis dextram
 tollentis , sinistram demittentis ,
 eratque ipsius statua columnæ im-
 posita quam Augustus victis Sa-
 lassis Alpinis gentibus dejecit ,
 eique Iovis statuam substituit ,
 cum inscriptione in substituta
 basi , IOVI. O. M. GENIO

Guich.
 Histor.
 Sab.

LOC

LOCI FORTVNAE REDVCI
TERENTIUS VARRO.

XI. Nymphar. Griselicar.

*In pago Greoulx Provincia Gallicæ,
ad balnea reperta.*

<p>NYMPHIS XI. GRISELICIS</p>

Nemorum Deas sequatur Nympharum chorus¹, quæ hoc in pago verisimiliter olim *Grifelo* dicto, cum recentiori nomine *Greoulx* conueniente *Grifelicæ* cognominabantur, balneorum illic celebrium custodes.

XII. Nymphar. Percernium.

Vasione.

NYMPHIS A V G.
 PERCERNIBVS
 T. GINGETIVS
 DIONYSIVS
 EX VOTO

Quam verò ob rationem *Percernium* agnomen sibi adsciscât Nymphæ Vasionenſes, tam mihi ignotum est, quàm quod ignotiſſimum, hoc duntaxat me non latet *Percernios* fuiſſe nonnullos; inter Romanos, eorùmque quatuor nomina legi in inſcriptionibus Gruterianis, verum aliquiſne ejus familiæ *Percerniæ* Vasionem translatus fuerit, qui Nymphis iſtis nomen ſuum

commodaverit , hîc opus , hîc labor est.

XIII. Aquar. Albularum.

*Romæ , apud Sculptorem ædis
Barberinæ.*

AQVIS ALBVLIS

SANCTISSIMIS

VLPIA ATHENAIS

CLAVD... AVG...

LIS VXOR

LIBENS.

Nobilissimum Italiæ fluvium Tiberim , prius dictum *Albulam* ex Dionysio Halicarnassico discimus , is enim *antiquit. Rom. lib. 1^o*. refert Regem Albæ Tiberinũ , cùm prælio iuxta flumen commisso periiisset , abreptusque esset aquæ currentis impetu , fluvium qui prius Albula vocabatur *Tiberin* de suo nomine vocatum reliquisse : verum ad eas antiquitates tam dissitas recurrere non opus est, cùm ex Strabone

one habeamus. Planiciem eam Geogr.
 er quam delabitur Aniene flu- lib. 5.
 rius , *Albulas* etiam perfluere
aquas frigidas , quæ ex pluribus
 fontibus delapsæ , ad varios mor-
 bos potæ aut pro balneo vsurpa-
 tæ remedium præbent , inde ab
 utilitate , earum sanctitas asseve-
 rata.



XIV. Clatræ.

Rome, Tabula area apud Falerios,
ex Peiresk. Schedis.

APOLLINI. CLATRAE

hic subest fig.

Apollinis nudi,
dextrâ lyram tenentis,
Sinistra fulmen
radiato capite,
sed modius supra
caput inſtar Sarapidis

hic subest fig.

Isidis ſtolata,
dextrâ ſiſtrum
& ſerpentem
geſtantis, ſiniſtra
meſſuram, cui
inſcriptum ΠΥΧΟΝ.

infra legitur hac inſcriptio,

LERPIRIOR. SANTIRPIOR. PVIR. FOR.
FOVFER. VERTIER. PIERIR. VOTIR.
FARER. VEF. NARATV. VEF. PONI.
SIRTIR.

Mirum eſſet hîc Apollinem ſub
habitu tam vario designatum eſſe,
fulmen

fulmen enim Iovem, modius Sarapidem, lyra Apollinem notant, nisi jam nobis notum esset Serapidem inter Ægyptios cultum eundem esse ac Iovem & Ammonem & Solem & Æsculapium, quod præter Tacitum, Athenæum aliósque authores ex nummo Antonini à Seguino jam vulgato constat, in cuius parte auersa cernitur caput barbatum instar Iovis, modio supra caput instar Sarapidis, radiis coronatum ad instar Apollinis, cum cornu Ammonis & Plutonis tridente. Mihi etiam contigit videre Iaspidem antiquam Constantinopoli apud D. Couvel Legati Anglici Capellanum, in quo circa caput Sarapidis inscripta hæc verba ΕΙΣ ΖΕΥΣ ΣΑΡΑΠΙΣ, id est, *unus Iupiter Serapis*, vnde cum tot numina & eorum dotes in se contineret Serapis, non mirum si ipsi alium lapidem preciosum inculpserint, quem prædictus Anglus possidet, cum his verbis circa caput Serapidis ΜΕΤΑ ΤΟ ΟΝΟΜΑ ΤΟΥ ΣΑΡΑ-

Select.
numism.

P. 3.

u/

ΠΙΔ^ΩΣ : magnum nomen est Serapidis.

Verum quid sibi velit nomen illud *Clatra* sociæ figuræ superscriptum? Isidem quidem sistrum & mensura Nili indigitant. Sed vox ea ignota. ΠΥΧΟΝ autem cubitum vel aquæ mensuram vel vlnam crescentis Nili in templo Serapidis fuisse refert *Socrates* lib. 1. cap. 14. quam Constantinus ad Ecclesiam Alexandrinam deferri iussit : & ΠΗΧΥΣ Herodoto, Aristophani *vlna*, *cubitus* est. Subiectas quatuor lineas linguâ Hetrusca scriptas esse, ex similibus quæ apud Gruterum extant, vbi nonnulla verba eadem occurrunt, verisimile est. Sed qui eas interpretabitur erit mihi magnus Apollo.

XV. Dei Vintij,

Seyffel ad Rhodanum.

DEO VINTIO
 POLLUCI
 CN. TERENTIVS
 BILLONIS FILIVS
 TERENTIANVS
 EX VOTO.

An Pollux Castoris frater *Vintij* cognomen assumat ex vrbe *Vence* in Provincia, quæ olim *Vincium* aut *Vintium* appellata est asserere non ausim, cum procul ab ea vrbe reperiatur hic lapis: quanquam similis denominatio in inscriptione *Marti* dicata, non mediocriter me movet, ut id pro certo statuam: ea enim his verbis, in dictâ *Ventiorum* vrbe legitur, MARTI VINCIO M. RVFINVS SAL. IIII VIR ET INCOLA CEMENEL. EX VOTO

VOTO id est , *Marti Vincio Marcus Rufinus Felix Saliniensis & incola Cemenelensis ex voto. Salinium in Provincia , nunc invocatur Castellane , Cemenelium verò Cimies.*

XVI. Cælestis.

*Florentiæ in palatio magni Ducis,
ex Africa allata.*

CAELESTI AVG. S.

Q. MALLIVS PRIMVS

AD AMPLIATIONEM

TEMPLI ET GRADVS

DONAVIT -X CXXV.

VOT. SOL. LIB. ANI.

*Id est Cælesti Augustæ sacrum
Quintus Mallius Primus ad ampli-
ationem templi & gradus donavit
Sester*

*estertia C X X V. voto soluto libenti
 nimo. Quænam autem Dea illa
 Cælestis, conjici posset ex alia in-
 scriptione, ubi Bona Dea quæ à
 mulieribus Romanis colebatur,
 eundem cognomen habet. Sic enim
 in ea legitur, Arculi in Italia.
 Bonæ Deæ sanctissimæ Cælesti L. Pas-
 quidius Festus redemptor operum
 Cæsaris, quod adjutorio rivom aquæ
 Claudie Augustæ sub monte Æflia-
 to consumavit Imp. Domitiano Cæs.
 Aug. Germ. Cos. V l. Non. Iul. Vn-
 de Cælestem hanc Deam eandem
 esse ac Bonam Deam asserere quis
 posset. Verùm idem cognomen
 Veneri etiam tribui video in an-
 tiquis inscriptionibus, ideoque res
 non incerto hæret. At forte quispiam
 Aug. Augusto esse dicet, sed ex eo
 ipso se minimè in antiquis marmo-
 ribus explicandis versatum esse
 proderet, nec nobis hac in re pal-
 lam præriperet. Certum enim le-
 gendum Cælesti Augustæ, ut in aliis
 Junoni Augustæ, Marti Augusto, Ve-
 neri Augustæ sexcentisque simili-
 bus. Quòdque ad propositum no-
 strum*

strum est sequentem inscriptionem
Florentiæ repperi , in hortis Mar-
chioni's Richardi. INVICTAE
CAELESTI AVR. ONESI-
MVS D.D.

XVII. Dianæ Ræsianæ.

Romæ repert. in via Appia.

DIANAE RAESIANAE
Q. RAESIVS Q. FIL. SVRDINVS
CVM RAESIA HERCVLA-
NIOLA.

Privatum hoc Dianæ cogno-
men , non dubium est quin ab illa
Ræsiorum familia fuerit derivatum,
à templo scilicet aut sacello in eo-
rum ædibus erecto. Huius autem
Quinti Ræsiij Quinti filij Surdini
aliud epigramma citatur à Spanhe-
mio in quo *miles veteranus cohor-*
tis septimæ vigilum appellatur : sic
se habens.

RAESIANORVM FAMILIÆ
 Q. RAESIUS Q. FIL. PAC.
 VRDINVS MIL. VETER.
 COH. VII. VIGIL. V. F. SIBI
 ET SVIS LIBERIS IDEM
 LIBERTIS LIBERTABVSQVE
 SVIS DDXL. IN HYPOGV̄M
 TESTACI.....

XVIII. Togotis.

In Hispan. prope Tagum.

T O G O T I

L. V I B I V S

P R I S C V S

E X V O T O

Ioannes Mariana qui primus
 hanc inscriptionem protulit lib.
 1^o. de Regis institutione, legen-
 dum censebat *Toxoti* ut sit co-
 gnomen Dianæ ab arcu & sagit-
 tis

tis tractū , sed nihil temere immu-
tandum , faciliusque nos in opinio-
nibus nostris , quàm sculptorem
in literis suis errare : magisque
placet Reinesio Togoti quod no-
men Hispanicum barbarumque
alicuius Dei indigenæ redolet , vi-
de fusiùs apud eundem author
epist. pag. 241.

XIX. Matris Deum Angistes.

Venetis, in palatio Grimani.

ΜΗΤΡΗ^I ΘΕΩΝ ΑΓΓΙΣΤΕΙ
ΑΜΕΡΙΜΝΟΣ ΟΙΚΟΝΟΜΟΣ ΤΗΣ
ΠΟΛΕΩΣ ΕΥΧΗΝ.

id est

*Matri Deum Angisti
Amerimnus æconomus
Urbis, votum posuit.*

Insculpta est in superiori mar-
moris parte sedens Cybele capite
turribus coronato, cum duobus
leonibus

onibus ad pedes, qui ipsius ty-
 us est frequens, sicut & cogno-
 gnomen Matris Deûm, cui titu-
 lus alter additur intellectu diffici-
 lis ΑΓΓΙΣΤΕΙ scilicet, doctioribus
 forte notus. Sæpius etiam inte-
 gro cognomine dicebatur Mater
 Deûm magnæ Ideæ, quod in mon-
 te Phrygiæ Ida coleretur, sicuti
 in elegantissima sequenti inscri-
 ptione nuper Deæ Vocontiorû re-
 perta, ubi priores quatuor lite-
 ræ M. D. M. I. significant Matri
 Deûm magnæ Ideæ.

X X.

Deæ Vocontiorum, Vulgò Die.

M. D. M. I.

SACR. TRIB. TAVR. FECER.

CVM SVIS HOSTIS ET APPARA-

TIB. OMNIB. L. DAGID. MARIVS

PONTIF. PERPET. CIVITAT. VA-

LENT. ET VERVLLIA. MARTINA

ET VERVLLIA MARIA. FIL. EO-

D

RVM PRO. SALVTE. IMP. ET
 CAESAR. PHILIPPORVM. AVGG.
 ET OTACILIAE. SEVERAE AVG.
 MATRIS CAES. ET CASTROR.
 PRAEEVNTIBVS. SACERDOTI-
 BVS. IVNI. TITO. XV. VIR ARAV-
 SENS. ET CASTRICIO. ZOZIMIO-
 NE CIVITAT. ALBENS. ET BLAT-
 TIO PATERNO. CIVITATIS. VOC,
 ET. FABRICIO. ORFITO LIBER.
 PATRIS. ET. CETERIS. ADSIS
 TENTIBVS SACERDOTIBVS
 V. S. L. M. LOCO VIRES CON-
 DITAE DIE PRID. KAL. OCT.
 IMP. PHILIPPO AVG. ET
 TITIANO COS.

Si cui faceffant negotium vo-
 ces abbreviatæ ut in lapide sculp-
 tæ sunt, en eas integras.

Matri

Matri Deûm magnæ Idææ. Sæ-
 cræ Tribus Taurobolium fecerunt
 cum suis hostiis & apparatibus
 omnibus Lucius Dagidius Marius
 Pontifex civitatis Valentia & Ve-
 rullia Martina & Verullia Maria
 filia eorum pro salute Imperatoris
 & Cæsaris Philippouum Augusto-
 rum & Otaciliæ Severæ Augustæ
 Matris Cæsaris & Castrorum præ-
 euntibus Sacerdotibus Iunio Tito
 quindecenviro Arausensi & Ca-
 stritio Zosimione civitatis Alben-
 sis & Blattio Paterno civitatis Vo-
 contiorum & Fabricio Orfito Li-
 berto patris & ceteris adfistenti-
 bus Sacerdotibus, voto soluto li-
 bens meritò. Loco vires conditæ.
 Die pridie Kalendas Octobris Im-
 peratore Philippo Augusto & Ti-
 tiano Consulibus.

Orange.
 Viviers.

Dic.

Sacræ Tribus, id est sacris de-
 stinata. *Taurobolium* est sacrifi-
 cium Taurorum, quorum sangui-
 ne perfundebantur, ij qui id per-
 cipiebant. Idque Taurobolium per-
 cipere dicebatur, ut in hac inscri-
 ptione Romæ in villa Burghesia à

me descripta *M. D. M. l. DD.*
NN. Constantio & Maximiano
Nobb. Cass. Conf. XVIII. Cal. Maij
Iulius Italicus V. C. XXVIR. S. F.
Taurobolium percepi Felic.

Vires Tauri ni fallor sūt ipsius te-
 sticuli, qui ad imitationem Sacer-
 dotum Cybeles abscindebantur.

XIX.

Patavij apud Excell. Comitem
Lazara.

I. D.

C. H E L V I V S

R O M A N V S

P R O S E E T S V I S

V. S.

Varias explicationes pati possunt hæ duæ literæ I. D. Sic *Iovi Deo* intelligi posset ut in numinis antiquis, vel *Isidi Domina*, quam Bononiæ vidi sic incipientem, *Domina Isidi &c.* Verum alia exogitare cuique licitum sit: forte etiam ignotus aliquis Deus vel Dea, cui *votum solvebat Caius Helvius Romanus pro se & suis.*

XXII. Nortia.

Romæ in villa Cesarini.

Festi Avieni Poëtæ, insignis memoria.

R. FESTVS DE SE AD DEAM

NORTIAM.

FESTVS MVSONI SVBOLES

PROLESQVE AVIENI

VNDE TVI LATICES TRAXE-

RVNT CAESIA NOMEN

NORTIA TE VENEROR LARE

C R E T V S V V L S I N I E N S I
 R O M A M H A B I T A N S G E M I N O
 P R O C O N S V L I S A V C T V S
 H O N O R E

C A R M I N A M V L T A S E R E N S
 V I T A M I N S O N S I N T E G E R
 A E V V M

C O N I V G I O L A E T V S P L A C I D A E
 N V M E R O Q V E F R E Q V E N T I
 N A T O R V M E X S V L T A N S V I
 V A X E T S P I R I T V S O L L I S

C A E T E R A C O M P O S I T A F A T O
 R V M I E G E T R A H V N T V R
 S A N C T O P A T R I F I L I V S P L A
 C I D V S

I B I S I N O P T A T A S S E D E S N A M
 I V P I T E R A E T H R A M

P A N D I T F E S T E T I B I C A N D I
 D V S V T V E N I A S

I A M Q V E

IAMQUE VENIS TENDIT DEX-
 TRAS CHORVS INDE
 DEORVM
 ET TOTO TIBI IAM PLAV-
 DITVR ECCE POLO

Festus, inquit Suidas, floruit
 tempore Valentis Romani Impe-
 ratoris, missusque fuit in Asiam
 Proconsul, unde non dubium est
 quin id de isto *Festo Avieno* intelli-
 gat, quem gemino Proconsulis
 auctum honore carmen nostrum
 perhibet. *Vulsinium* autem quo-
 lare cretus erat, vrbs fuit Italiae
 prope lacum qui nunc *Lago di*
Bolsena vocatur, cuius etiam ci-
 vis erat celebris ille ex suis mayo-
 ribus *Musonius* Philosophus Stoï-
 cus Apollonij Tyanei familiaris,
 quorum ad se invicem circumfere-
 bantur epistolæ ut monet Suidas.
 Sublatus autem à Nerone propter
 ipsius loquendi libertatem. Alte-
 rius etiam Musonij sub Ioviano

Imperatore Valentiniani & Valentis prædecessore meminit prædictus author. Legiturque forte ex ipsius posteris vnus anno Christi 450. Gennadius Valerius Corvinus Avienus Consul in fastis Capitolinis, & anno 501. & 502. alij duo Rufius magnus Faustus Avienus senior, & junior.

Quænam autem Dea illa *Nortia* fuerit, quâ suis carminibus veneratur Rufius Festus dicere difficile est; eam quidem in agro Sutrinorû præcipuè cultam constat ex Tertulliano in apologetico his verbis. *Romanas ut opinor Provincias edidi, nec tamen Romanos Deos earum: quia Romæ non magis coluntur, quàm qui per ipsam quoque Italiam municipali consecratione censentur. Crustuminiensium Belventinus, Narniensium Viridianus, Æsculanorum Ancaria, Volsiniensium Nursia, Oriculanorum Valentia, Sutrinorum Nortia, Faliscorum in honore est pater Curis. Vbi forte ex lapide reponenda esset Nortia ad Volsinienfes.*

XXIII. Proxumorum.

Vasione.

PROXVMIS
SENECA SECVNDI
FIL.

V. S. L. M.

ibidem

PROXSVMIS
POTITA C. COD
ONI F. V. S. L. M.

Nec faciliùs vobis nota faciam
numina hæc sive Deos sive Deas,
quibus *Seneca* nescio quis *Secundi*
filius & *Potita Caij Codoni filia* vo-
tum solvunt libens meritò. Quis
enim ea nunc noverit, quæ fortè
olim vicinis, proximisque tantum
innotuerant.

XXVI. Comedovorum.

*Aquis Sabaudicis. Vulgo Aix
en Savoye.*

C O M E D O V I S

A V G V S T I S

M. H E L V I V S S E V E R I

F I L. I V V E N T I V S

E X V O T O.

Quodnam insuper barbarum,
Allobrogicumve numen nobis hic
Marcus Helvius Severi filius Iu-
ventius obtrudat, mirari potius
licet, quàm suspicari. Cave au-
tem tu ipse suspicari me forte
nomen hoc malè scripsisse, eo
quòd paulò aliter à Guichenone
exhibeatur. Sed ei fidere me pro-
hibent sexcenti alij errores in eius
inscriptionibus dispersi; & meis
oculis usurpatum examinatumque
pro genuino habere non dubi-
tes

tes precor, deprecor, candide
• Lector.

XXV.

Romæ in villa Cesarini.


HERCVLI PONDERVM

Q. AEMILIVS VIBIANVS

B. TRIB. COH. III.

.....

Hercules ne ponderum custos
fuerit, ob iustitiam & æqualita-
tem ab eo dilectam, an verò in
ejus templo deposita pondera
ut in templo Opis. B. TRIB.
COH. III. *Beneficiarius Tribu-
ni cohortis tertie.*



XXVI. Herculis somnialis.

*Florentia, in aedibus Caroli
Strozzi Senat.*

V. F.

CULTORES HERCVLIS
SOMNIALIS IN.....
DIS MANIBVS SIBI ET
POSTERISQVE SVIS II QVI
INFRA SCRIPTI SVNT
Q. CAECILIVS. Q. GALLV-
CELLANVS T. FABIVS
L. ATTILIVS
SEX. SCVTARIVS.

Quam ob causam *Somnialis* cognomen habuerit Hercules incompertum mihi est, cum is vigilantissimus fuerit Heros: at fane omnia veterum Somnia discutere velle, somniantis animi exercitium foret.

XXVII.

XXVII. Gen. famil. mon.

Roma, in villa Montalto.

G E N I O

FAMIL. MONETAL.

DEMETRIVS CAES. N. SER.

EPAPHRODITIANVS

DE S. P. D. D.

Geniorum apud antiquos infinitus erat numerus. Genitum enim suum habebant Provinciæ, urbes, Senatus, populus, Collegia, Imperatores, familiæ, & personæ. Intellego autem per familiam monetalem, varios opifices, qui cundæ monetæ operam dabant, quorum pars in sequenti inscriptione legitur quam in villa Matthæi Romæ exscripti,

*Herculi Augusto Sacrum Felix
Augusti libertus optio & exactor
auri arg. æris item signatores suppo-*

stres Malliatores Moneta Caesaris nostri.

Cæterum huic Genio familiæ monetæ aram hanc *Demetrius Caesaris nostri servus Epaphroditianus de sua pecunia dedicaverat.*

XXVIII.

Romæ.


HERMA DE SVO DAT
GENIO CANONIS ATTALI
LIBERTI
GENIO PASICLENIS
ATTALI SERVI

Canon norma, mensurave est, sed quid ad rem nostram? Citatur à Falconerio talis inscriptio *Titiano & Gallieno Consulibus Tertullus Decij libertus ex figula Canonis operis Doliaris prima: hæc in figulinâ tegulâ inscripta, additque Canon fortè tributum est*

51
est quod solvebant figuli. Sed
aliud hîc significare scio , quid
autem , nescio.

XXVIII. Fortunæ Torquat.

*Romæ apud Cardinal. de
Maximis.*



Torquati Romæ illustres à
Manlio Torquato oriundi , qui
torque hosti detracto hoc cog-
nomen sumpsit , in eaque familia
ut nos docet inscriptio , ara for-

runæ erat dicata quæ inde Tor-
 quatiana dicebatur, à Quinto Cæ-
 cilio Narcisso, quem utrum is fue-
 rit idem cum eo *Narcisso* qui
 Claudio ab epistolis erat, nihil est
 quod aut suadere aut dissuadere
 possit.

XXX. Hosiri.

Roma.

M V T I L L I A
 A L B A N A
 H O S I R I E T
 F O R T V N A E
 S V P E R A E
 I M P E R I O
 P O S V I T.

Hosirum numen ignotum hic
 habes, neque enim Osiris est qui
 sine aspiratione scribitur & geni-
 tivo habet Osiridis. Sed notissi-
 mum erat Mutillæ Albanae, siqui-
 dem

dem ipsius Hofiri Imperio , id est
ejus jussu & Fortunæ superæ aram
posuerat.

XXXI. Matron. Vedianc.

*Prope Nicæam Prouinciæ
Gallicæ.*

M A T R O N I S
V E D I A N T I A B V S
P. E N I S T A L I V S P. F.
C L. P A T E R N V S C E M E N E L E N S I S
O P T I Q A D O R D I N E Δ L E G. XXII,
P R I M I G E N I A E P I A E F I D E L I S
L. M.

Meminit in Italiæ descriptione
Plinius populorum Prouinciæ con-
tiguorum ab Oriente qui ab eo
Vediantij vocantur & à *Ptolemæo*
ἑδιστάλνιοι quorum metropolis erat
Cimelium seu Cemenelium nunc
Cimiés vulgò dictum , cuius ci-
vis erat *Publius Enistalins Pater-*

Publius filius tribu *Claudia* *Decurio* legionis *vigesimæ secundæ*, qui *Matronis* illius regionis hoc lubens adscripserat votum. *Matronæ* autem illæ *Deæ* quædam erant provinciis, urbibusque invigilantes, eademque & *Matres* dictæ ut in sequenti lapide.

XXXII. Matrum Gerudat.

S. Esteves in Provincia.

M A T R I B V S

G E R V D A T I A B V S

I V L I A M I N I A

V. S. L. M.

Susplicatur, conjicit, divinat nonnunquam noster antiquitatis tutelaræ genius: sed sæpe etiam filer, imperitiæque quàm temeritatis argui præfert. Matres quidem seu Matras ut aliquando barbaræ vocitantur exposuit eleganter

Doctiss.

Doctissimus Chorierius in Vienne-
nensium antiquitatibus, sed istud
Gerudatiarum ascitum cognomen,
quo ex loco, peculiarive casu eli-
citum fuerit me prorsus latet. Ob-
serva. autem. in inscriptione Gru-
terianâ pag. xcii. legendum *Ma-*
trabus non *Mairabus*, ut erratum
est in operis illius indice. Eadem-
que Matres in hac brevi inscri-
ptione Græcè designantur: *Agathæ*
(vulgo Agde) in foro. ΑΡΗΙ ΜΗ-
ΤΡΑΣΙ ΚΑΙ ΔΙΟΣΚΟΡΟΙΣ. Id est
Marti, Matribus, & Iovis filiis
Castori & Polluci.

XXXIII. Her. Ausc.

In Aquitania.

FANO HER. AVSC.

ORRITS. HE SACRVM

G. VAL. VALERIANVS.

Fano Herarum Auscarum in-
terpretatur author notitiæ Vas-
conia qui eam adducit: secunda

linea ignota. Aquitanorum aut
Mela clarissimi sunt *Ausci*, & No-
 vem populos commendant *Aus-*
ci, & *Vasates* inquit, *Ammianus*
Marcellinus. *Heras* autem, *Ma-*
tres, & *Matronas* pro iisdem ha-
 bitas esse censeo.



XXXIV. Aufanarum.

Lugduni.

PRO SALVTE DOM.
 N. IMP. L. SEPT. SEVERI
 AVG. TOTIVSQUE DOMVS
 EIVS AVFANIS MA-
 TRONIS ET MATRIBVS
 PANNONIORVM ET
 DELMATARVM
 TI. CL. POMPEIANVS
 TRIB. MIL. LEG. I. MIN.
 LOCO EXCVLTO CVM
 DISCVBITONE ET TABVLA
 V. S.

Hanc solam ex nostris inscri-
 ptionibus citatam habemus à
 Grutero, sed lineis ultimis quin-
 que truncatam. Eam autem si ve-
 lis

lis sine abbreviationibus legere, sic
 habe. *Pro salute Domini nostri Im-*
peratoris Lucij Septimij Severi Au-
gusti totiusque domus ejus Aufanis
Matronis & Matribus Pannonio-
rum & Delmatarum, Tiberius
 Claudius Pompeianus Tribunus mi-
 litum Legionis primæ Minervæ, lo-
 co exulto cum discubitone & tabu-
 la votum solvit. Eæ autem Aufanæ
 Matronæ in Pannoniis, Dalmatiâ-
 que notæ, salutisque Severi cu-
 stodiam habentes quæ fuerint ig-
 norare facilius est, quàm de-
 tegere.



XXXV. Sulevarum.

*Romæ. Ex schedis Eruditiss.**D. Fabretty.*


S V L E V I S E T C A M P E S T R I B V S
 S A C R V M T. A V R E L I V S Q V I N -
 T V S > L E G. V I I X. G E M I N A E
 V O T V M S O L V I T L A E T V S
 L I B E N S D E D I C A V I T V I I I. K.
 S E P T E M B R E S B R A D V A E T
 V E R O C O S S.

Obmutesco iterum in istis numinum monstris, *Sulevis Campestribusque* quibus *Titus Aurelius Quintus Centurio legionis decimæ septimæ geminæ votum solvit*. Dedicatio autem aræ illius *Octavo Kalendas Septembres accidit Bradua & Vero Consulib.* qui integro nomine in Fastis Capitolinis *Titus Vibius Varus & Apinus Annius Bradua* nuncupantur, qui Consulatus

fulatus incidit in annum 161. æræ
Christianæ *sub Antonino Pio*. Ad-
sunt autem in superiori parte la-
pidis Deæ tres sedentes , infra
quas sacrificium verris à figuris
quibusdam sagatis peragitur.

XXXVI. Dullovi.

Vasione.



ibidem

DVLOVIO

ibidem

INO DVLOVI VIVOS

In

In priori illa basi sculptus est
Deus *Dullovius* sedens palmis cir-
cundatus. Sed quis hic Deus alibi
gentium ignotus? Vasionensis qui-
dem cùm toties eius nomen repe-
tatur. Sed plura à me non quæ-
ras, si repulsam pati nolueris.

XXXVII. Trittiæ.

In Provincia, territorio de
Pierre-feu.

<p>TRITTIÆ M. VIBIVS LONGVS V. S. L. M.</p>

Huius etiam loci indigenam

Deum adorat *Marcus Vibius Longus*, non minus mihi ignotus, quàm ipsius numen.

XXXVIII. Deæ Seg.

*Fori Segusianorum, vulgo Feurs
reperitum.*

D E A E

S E G.

F.

P O N D O

X.

Pondus antiquum hîc exhibeo ex ære, nobis septem librarum & semis pondo, antiquis Romanis decem librarum, siquidem illa duodecim tantum vnciis constaret. Habet autem literis extantibus argenteis inscriptionem hanc DEAE SEG. F. PONDO X. quam D. de la Mure, in *Hi-*
storia

istoria sua Foresiana , explicavit
Deæ Segusianorum Fori Pondo de-
cem. Id enim pondus in urbe
Feurs repertum fuit quæ olim
 erat *Forum Segusianorum.* Quæ
 autem Dea illa fuerit ambiguum:
 urbi s quidem protectrix , ge-
 niúsve peculiaris. Fortè etiam
 Diana quæ ob sylvarum copiam
 apud Segusianos colebatur , unde
 in eadem urbe corpus *Fabrorum*
signuariorum in antiqua inscrip-
 tione legitur.

XXXIX. Eumeli

Neapoli.

ΕΥΜΕΛΟΝ ΘΕΟΝ ΠΑΤΡΩΟΝ
 ΦΡΙΤΟΡΣΙΝ ΕΥΜΗΛΕΙΔΩΝ
 Τ. ΦΛΑΥΙΟΣ ΠΙΟΣ
 ΦΡΟΝΤΙΣΤΗΣ ΑΝΕΘΗΚΕΝ
 ΣΥΝ ΤΩ ΦΛΑΥΙΩ ΤΕΚΝΩ,

Eumelum Deum patrum Tri-

buum Eumelidarum magistris T.
Flavius Pins curator posuit cum
Flavio filio. Herois cujusdam Eu-
meli meminit Strabo in Achaicis, Caup
 quem Patrensiū primum Regem
 conditorēque ait , unde fortè
 quis conjiciat non πατρώων legen-
 dum, sed πατρίων Patrensiū. Ve-
 rùm temerè nihil immutandum.
 Neapolis autem cū fuerit Græ-
 corum colonia, non dubium est
 quin eorum Deos, semideosque
 coluerit.



X L. Moritasgi.

*In ruderibus Alesia urbis
apud Heduos.*

TI. CL. PROFESSVS NIGER
OMNIBVS HONORIBVS APVD
AEDVOS ET LINGONAS FVNC-
TVS DEO MORITASGO PORTI-
GV M TESTAMENTO PONI IVS-
SIT SVO NOMINE ET IVLIAE
VIRGV LINAE VXORIS ET FI-
LIARVM CL. PROFESSAE ET
IVLIANAE VIRGV LAE.

Hæc de eo Reinesius epistolar. Lib. 5.
pag. 683. Ex Cæsaris Commenta- de bello
riis, constat ejus in Galliam ad Gallico
ventu *Moritasgum* apud Senonas cap. 54.
in autoritate fuisse: Cavarinū ejus
Fratrem à Cæsare ibidem constitu-
tum: Hinc circa pars Galliæ
Deum *Moritasgum* cujus notitiam

etiam Romani homines Claudiæ
 Iuliæque gentis, translati in Gal-
 lias, uti alij Endovelici & Togo-
 tis Hispanorum Lusitanorumve
 localium numinum, habere potue-
 rint satis manifestum est. Sive au-
 tem Cæsarianum istum sive alium
 θεῶν τιμον è majoribus ejus Seno-
 num Regibus antiquiorem, à suis
 pro Deo habitum dixerimus, per-
 inde est: eò tamen inclino ut po-
 sterius præferam fueritque Cæsa-
 re Gallias acquirente divinitas
 Moritasgi & cultus vetus apud
 Senonas religio, non eo primum
 tempore cœpta in memoriam me-
 ritorum olim Regis & Imperij,
 eique mortuo divini honores de-
 creti, dedicato eidem intra vr-
 bem porticu à Tiberio Claudio
 Professo, ejusque uxore ac fi-
 liabus..




X L I. Beladucadri

In Britannia.

D E O B E L A D V C A D R O

L I B. V O T V M F E C I T I O L V S.

Non alius est Deus iste , quàm
 qui apud Gruterum levi differen-
 tiâ ~~tet~~ Belatucadri nomine insignitur,
 nec ex noua hâc inscriptione ali-
 quam lucem fcenerari licet , quod
 qualëve fuerit numen. Hoc ta-
 men certum est. fuisse privatum
 aliquod Britannorum Deum, nus-
 quam enim alibi ipsi litatum esse
 ex monumentis antiquis erui-
 mus.



XLII. Nehalennia:

*Domburgi reperta ad mare nunc
Vestcapell. in Britan.*

DEAE NEHALENNIAE

OB MERCES RITE CONSER-
VATAS M. SECVND. SILVANVS
NEGOTIATOR CRETARIVS

BRITANNICIANVS

V. S. L. M.

ibidem.

DEAE NEHALENNIAE

SEXT. NERTOMARIVS

NERTONVS

V. S. L. M.

Habentur & aliae sex similes
apud Reinesium cujus hinc verba re-
feremus. *Repetitio ejusdem numi-
nis in pluribus lapidibus eodem lo-*

co effossis confirmat Deam Nehalenniam fuisse *Ἐπὶ τῶν* populorum circa ista Oceani aestuaria olim habitantium & negotiationibus trans mare deditorum, ipsique Oceano & fluminibus advenis præsidere creditum numen. Idémque author asserit has inscriptiones sculptam habere in vno latere Deam sedentem canistrum fructibus plenū gestantem, in aliis verò lateribus Neptunū & Mercuriū conspici quod etiam observavi in earum typis æri mandatis. Cæterum negotiator artis Cretariæ: ut alibi apud Gruterum negotiator Cretarius, qui cretam negotiabatur. Britannicianus, eo quòd in Britannia fodinæ Cretariæ essent: ex Plinio lib. 35. c. 17.



XLIII.

Nemaus : ex Peiresk. schedis.

... Ν Ε Μ Α Υ Σ Ω ...

ΟΥΔΠ. ΤΡΑΙΑΝΟΝ ΚΑΙΣΑΡΑ
ΣΕΒΑΣΤΟΝ,

Id est

Nemauso (Deo)

*Vlpium Trajanum Caesarem
Augustum.*

Nemausum quem Herculis filium nonnulli asserunt, inter Deos à Nemausensibus repositum fuisse evincunt marmora & nūmi, ut iam orbi erudito exhibuit Clariss. *Patinus, lib. de nummis æreis mediæ formæ*: ubi ejus caput casside armatum in nummo coloniae Nemausensis cernitur. *Hic enim vetustissimus bene merētibus referendi gratiam mos, ut tales numinibus adscribantur*: ex *Plin. lib. 7. c. 7.* Is enim Nemausus, unus ex eius urbis priscis heroïbus censebatur, qui nomen suum ei imposuerat. Eiusdémque Dei Nemaus

si mentio fit in sequenti inscriptione mihi ab erudito Guyrano communicata.

DEO SILVANO ET LIBERO
PATRI ET NEMAVSO
...ARCHVS SINODI.

^LXIV. Dei Tyrimni,

Thyatira.

ΑΓΑΘΗ ΤΥΧΗ
ΑΝΤ. ΚΛ. ΑΛΦΗΝΟΝ ΑΡΙΓΝΩ-
ΤΟΝ ΚΡΑΤΙΣΤΟΝ ΕΠΙΤΡΟΠΟΝ
ΤΟΥ ΣΕΒ. &C. ΤΟΝ ΚΑΙ ΣΕΜΝΟ-
ΤΑΤΟΝ ΙΕΡΕΑ ΤΟΥ ΠΡΟΠΑΤΟ-
ΡΟΣ ΘΕΟΥ ΤΥΡΙΜΝΟΥ
ΟΙ ΒΑΦΕΙΣ.

id est

Bona Fortuna.

*Antonium Claudium Alfenum Ari-
gnotum potentissimum Procuratorem
Augusti, &c. & Venerandissimum
Sacerdotem primi parentis Dei Ty-
rimni, Tinctores venerantur.*

Nolui

Nolui totam hanc inscriptionē citare quæ longissima est, titulifque illius *Alfeni* plena, eo quòd minùs ad propositum nostrum faciat, eamque ad aliud opus reservandā censeam. Florebat is *Antennius Alfennus Arignotus* Caracallæ temporibus, ut ex aliis lapidibus constat. Eū autē *Tyrimnum* Thyatirenorum *Θυχάριον* & indigenam Deum fuisse, patet ex ipsius memoriâ sæpiùs in marmoribus ejus urbis repetitā, præsertimque in alio ubi ΤΟΥ ΠΡΟΠΟΛΕΩΣ ΤΥΡΙΜΝΟΥ legitur: quod præterea templum ejus ante urbem fuisse monet. Hoc autem monumentum *Alfeno* erectum à Tinctoribus Thyatiram inhabitantibus: ibique fortè purpuræ tangebantur, quarum commercium tractabat *Lydia* illa Thyatirena Philippis habitans, quæ à Divo Paulo ad Christi fidem conversa fuit. *Act. Apost. cap. 16.*

F I N I S.

*Eruditissimi Viri Nicolai Bon Cre-
tensis Iuris utriusque Doctoris,
ad Authorem,*

Epistola.

Clarissime ac eruditissime Vir S. Pl.

Ignotorum Deorum aras quas nuper-
rimè in lucem dare cœpisti, ac iti-
neris tui delicias amicis ac posteris
exantlare læto animo deliberaſti, bene
factum eſt. De prima illa inſcriptione
Iovis nonnulla mihi dicere ſuppeditant.
Arduum quidem eſſet de *Iove Cingiduo*
quærere, ni lumen de lumine, ac lu-
men lumini adderemus. Iupiter enim
Optimus Maximus aliquando à mōte,
à flumine, à civitatibus denominatus.

Cinga fluviuſ eſt Hiſpaniæ Citerioris
ex Pyrenæis montibus fluens de quo
Lucanus lib.4.

Camposque coërcet

*Cinga rapax, vetitus fluctus, & litto-
ra curſu.*

Oceani pepuliſſe ſuo :nam gurgite miſto

*Qui præstat terris , aufert tibi nomen
Iberus.*

Nec mirum ideo si à *Cinga* fluvio ,
Cingiduns Iupiter dictus. Diceres po-
tius *Cingaduns* non *Cingiduns*. Quin-
imò temera propositio mea esset, inscri-
ptionem Genevæ repertam prope flu-
men Arvam, in Hispaniæ citerioris par-
tibus ponere : Hæc occurrunt mihi ob-
iicienda , tu faciliùs solve.

Cæterum gratias ago , pro inscri-
ptionibus ad me missis quæ tibi de
Neocoris occurrerunt. Albertum Rube-
nium quæ mihi indicas possideo , verùm
diversa sum ab eo sententia , circa *Neo-*
coros , vt te aliquando perlegere iuva-
bit , in eo libro cui adornando incum-
bo , illum forte brevi editurus. Mihi
credas quæso , circa hanc materiam me
evoluisse quicquid libri , nummi , mar-
moraque suggerunt ; ne tamen si quid
in ea re me iuvare poteris omittas , ne-
que me amare desinas,

Venetiis 17. Octob. 1676.

Tuum NICOL. BON.

Ex Epistola R. P. *Ægidij Lacarry,*
Claromonti Matheseos & Theologiae Pro-
fessoris, celeberrimique Chronographi.

Inscriptio *Iovis Fagutalis* pag. 12. scul-
 pta est anno Dominicæ Incarnationis
 110. quo incidebat Tribunitia potestas
 XIII. Trajani. IMP. VI. conjunctum
 cum Tribunitia potestate XIII. erro-
 ris convincit nummum *Oconis* pag.
 207. qui Consulatam V. Trajani cum
 Imperatore VIII. combinat, siquidem
 anno decimæ tertiæ, decimæ quartæ &
 decimæ quintæ Tribunitiæ potestatis,
 ejusque sexti Consulatus, Trajanus erat
 duntaxat IMPERATOR VI.

Pag. 18. & 19. ubi legitur *Gentiano &*
Basso Coss. Scribis anno 210. Gentia-
 num & Bassum fuisse Consules. Neces-
 se igitur est ut Gentianus fuerit *Consul*
suffectus, siquidē iuxta Fastos correctio-
 res, anno Dom. 210. vel 211. *Pomponius*
Bassus Consul erat ordinarius, cum
Quinto Epidio Rufo Lolliano, non autem
 cum *Gentiano*.

Pag. 21. & 22. Correctio & sub-
 stitutio *Sosij* in locum *Nonij* proba

mihi videtur , convenitque anno Domini 149. Habent autem Fasti solùm *Ser. Cornelius Orfitus* omiſſa voce *Scipio*. Sed ſæpiùs ex quatuor nominibus quæ Conſul aliquis poſſidebat , tria tantum aut duo referèbant. Imperatorum tempore proprium nomen erat vltimum, verùm ante Imperatores proprium erat penultimum. Ad Priſcum autem quod attinet is forte quatuor his nominibus inſigniebatur *Q. Nonius Soſius Priſcus*.

Inſcriptio pag. 23. & 24. Iovi O. M. dicata , Terentij Varronis eſt , annóque vrbiſ conditæ 719. Ante Chriſt. 25. quo tempore prædictus Terentius Varro Salaffios debellavit , ſub haſta venditis quatuor ſupra quadraginta millibus. Tuncque temporis fabricata eſt Auguſta Prætoria in eamque miſſa colonia Prætorianorum militum. Hi Salaffij (vbi nunc *la val d'Aoſte*) è Gallia oriundi erant , hæcque vallis Alpes Peninas à Graiis Alpibus dividit.

Quodnam autem iudicium feram de inſcriptione pag. 33. hæreo , vbi *Feſtus rivum Aquæ Claudie Auguſtæ ſub monte Æſliano conſummavit* , Imperatore *Demitiano*

Domitiano Cesare Augusto Germanico Consuli VI. Non. Iulij. Dubium enim meum est an debeam numerum VI. Consuli, vel Nonis Iulij referre. Mihiq; concludendum videtur Nonis Iulij non Consuli referendum, eo quod Domitianus nondum Augustus esset in suo VI. Consulatu, cum tamen in inscriptione Augustus designetur.

Ex Responsoria epist.

Quod mones, *Vir eruditissime*, Gentianum non notari Consulem in fastis ut pag. 19. assereram, fortèq; suspectum fuisse, repono eundem esse Gentianum illum quem tu Q. Epidium Rufum Lollianum vocitas. Sic enim Fasti Siculi eo anno. *Gentiano & Basso.* Fasti vero Capitolini tom. 3. hist. Augustæ typis VVechehianis, horum Consulium nomina sic habent *Q. Epidius Rufus Lollianus Gentianus & Pomponius Bassus.* Non tamen idem de altero Consule statuendum existimem, qui in Fastis *Nonius*, in lapide à me exscripto legitur *Sosius*, quasi fortè, ut ais, Consul integro nomine vocatus fuerit *Q. Nonius Sosius Priscus*; sunt enim duæ familiæ

diversæ *Nonia* & *Sofia*. Duo enim cognomina habere Romanum aliquem sæpius contigit, non item duplicem familiam, nisi adoptaretur in aliam, in quo casu nomen familiæ suæ genuinæ in cognomen mutabat, veluti Scipio Africanus qui in gente Æmilianus natus erat, adoptatus in Corneliam dictus est, *Cornelius Scipio Æmilianus*. Igitur standum vel fastis Capitolinis qui Nonium vel lapidi qui Sonium exhibet. Mihi autem plus authoritatis habere videntur antiqua marmora, quàm libri nunc typis mandati, olim toties descripti, & à descriptoribus alterati.



I A C O B O S P O N I O

*Litteraturæ elegantioris amatori
& rei Antiquariæ promotori saga-
cissimo. A. GALLANDIVS*

Χαίρειν καὶ ἐντοπάζειν.

VIR DOCTISSIME,

Cum heri D. VAILLANT & ego vnâ
essemus in Musæo D. de Creil, quod
iis, quos vulgò Curiosos vocant, Do-
minicis & aliis festis diebus patet, quæ-
reremque ab eo numquid noui habe-
ret, quod, vel ad numismata antiqua,
vel ad rem literariam spectaret: habeo,
inquit, à D. Sponio libellum de Diis
ignotis, quem ad me misit: simulque
legendum si vellem obtulit. Eò liben-
tius annui, quòd! cùm non ità pridem
te è Græciâ reducem sciam, de Diis illis
aliquot à me ex veterum marmorum
rueribus ibidem annotatis mentionem
habiturum te existimarem; animûsque
erat experiendi num tu & ego in eadem
inci

incidissemus. Itaque post discessum
 è Musæo , cum illo domum venio , li-
 bellum in manus traditum evolvere , in
Iovem pecoralem incido. Tum Iovem il-
 lum novi , inquam. At , postquam
 quid de eo narrares percurrissem , non
 cohærent quæ de eo D. Sponius : res
 aliter se habet , atque hic refert. Dein,
 cum è titulis te nullum alium è Græciâ
 Deum non prius notum attulisse agno-
 vissem præter Thyatirenorum *Tyrim-*
num. Habeo , inquam Dño Vaillant,
 quiddam de Diis ignotis, quod erit colli-
 gam , & ad Sponium mandabo vnâ cum
 iis, quæ mihi quàm illi , de *Iove pecorali*
 perspectiora sunt , vt si opusculum il-
 lud iterum editurus sit aliquando , id
 inferat : si prius meam ad eum episto-
 lam te missurum & commendaturum
 spondeas. Hoc , pro amicitia cum li-
 benter spondisset , discessi ab eo
 lætus , quòd te noscendi tamdiu quæ-
 sita , sese tandem obtulisset occasio.
 Cogitabam verò , quandoquidem eras
 domi , quâ viâ mihi ad te accessio fie-
 ret vt tibi quidquid habeo inscriptio-
 num antiquarum vt cum tuis coniun-
 geres & ederes , offerrem ac commu-
 nicarem

nicarem. Siquidem te quater centum collegisse audio è Græcia , ego autem vix centum : quarum non dubito plurimam partem te possidere , cum fieri non possit ut eadem tibi & mihi non obviæ fuerint : tamen agnosco ex tuo libello me habere aliquot tibi non visas , quandoquidem in illis Deorum quorundam ignotorum sit mentio , de quibus tu ne verbum quidē : Duas aut tres hic apponam , postquam totum id quod ad Iovem pecoralem attinet exposuero. Nam , ὁ *Sponi πολυμαθέσαιτε* , illa crypta admirabilis marmoreis & crystallinis congelationibus spectantium animos obstupefaciens , nihil cum illâ inscriptione,

ΟΡΟΣ ΔΙΟΣ ΜΗΛΩΣΙΟΥ.

habet negotij , neque ad cryptæ ingressum scripta. Crypta enim in insulâ *Antiparo* , inscriptio vero *Naxi* , in cli-vo , qui ad montis totius insulæ altissimi verticem ducit , ita ut à crypta ad Inscriptionis locum , Italica plusquam triginta millia intercedant , & Paros, Naxum inter & Antiparum interponatur. Narranti mihi fidem adhibeas, nam
primus

primus fui qui cryptam illam singula-
rem *D. Nointelij* iussu adij & subij, vt
me referente num res digna esset, ad
eam invisendam, itineri se daret; pri-
mus etiam qui prædictam inscriptionem
legi. Itaque in illa cryptâ quæ sita est
in extremitate insulæ Antipari versus
Lybicum, quinque millibus à pago
qui solus in insula habitatur, nulla alia
adeest inscriptio præter illam quæ anti-
quorum Græcorum qui visendi causa
acceserunt nomina exhibet, & aliam
ex quâ præter illud nomen ΔΟΜΝΑ,
nil legere potui, quòd tota stillicidiis
congelatis obtecta & obliterata esset.
Nostra vero hæc

ΟΡΟΣ ΔΙΟΣ ΜΗΛΩΣΙΟΥ

Sculpta visitur characteribus antiquis-
simis in petrâ marmorea rudi & impoli-
tâ quæ scalprum numquam passa est ni-
si vt hos reciperet, iuxta viam quâ
itur à pago satis magno cui nomen
ἀνέπατο, ad verticem montis quem
hodie οἱ νινώται *Zia*, ab illo pro-
culdubio Iove nuncupant: scis enim
apud hodiernos Græcos quam sint lit-
teræ δ. & ζ. affines. Indicata mihi fuit
à

à Papa quodam Græco , qui cùm sciret
D. Nointelio summum apicem petenti,
 vt inde vicinas Archipelagi Insulas con-
 sideraret , transeundum , mecum liben-
 ter venit vt petram illam mihi ostende-
 ret. Hanc etiam *D. Legatus* ipse de viâ
 prospectavit. Statim mihi & aliis pa-
 tuit vnde hodierna huius montis ap-
 pellation nec adeò mihi difficile fuit
 conijcere quâ ratione adducti Iovi pe-
 corali eum consecrarint : animo enim
 occurrebat , Montes , quòd altè in aë-
 rem sese attollant esse sub Iovis ditio-
 ne , antiquos autem , hunc illi deo , vt
 totius insulæ celsissimum utpotè qui à
 centum & viginti millibus Italicis con-
 spicitur, tandumdem enim spatij à Naxo
 ad Chium , ex cuius parte occidentali
 tempore sereno spectatur , dedicasse ,
 ac pecoralem dixisse , quod pascua sint
 illic abundantissima , ad quæ , vt nunc
 fit omnis generis pecora abigebant.
 Enim verò circumquaque , nil nisi
 ovium & caprarum greges videbamus
 qui tenellulas & autumnales herbas
 depascebant , ac cistum maximè cuius
 humore glutinoso quem ladanum vo-
 camus barbas suas mente Iunio in-
 ficiunt

ficiunt capræ. Porro ex illo vertice qui acutissimus est & in medio ferè insulæ positus sequentes Ægæi maris insulæ & scopuli oculis usurpantur, atque equidem in gyrum hoc ordine ab oriente versus meridiem, *Pathmos*, *Stenoufa*, *Schinoufa*, *Amorgos*, *Astypalæa*, à Meridie versus occasum *Therasia*, quæ nunc *Santorini*, *Ios* ubi sepultus *Homerus*, *Pholegandros*, & ab occasu versus Boream, *Milos*, *Paros*, *Antiparos*, *Siphnus*, *Seriphus*, *Thermia*, *Cea*, *Syrus*, *Eubœa*, *Andros*, *Tenos*, *Delos*, & *Myconus*. Ita ut *Naxos* media ferme omnium cycladum esse videatur. Ut memoria ad posteros manaret Legatum è Gallia missum illuc ascendisse; hanc inscriptionem iussus à D. Marchione *Nointelio* incidi curavi in marmor album, marmoreus enim fere totus ille mons, à sculptore qui è proximo pago accersitus fuerat. *Ex hoc vertice montis Iovis Melosij Maris Ægæi circumvicinas insulas considerabat Car. Fran. Olier de Nointel: Imper. Gall. Legatus. XXIV. Novemb. M. DC. LXXII.* Antrum etiam habet mons ille à parte occidentali, cuius aditus angustus, sed statim post

post ingressum se se in altum expandit & in longum, sed non in profundum: congelationes habet aliquot, sed raras nec pulchritudine cum antri Antiparij cōgelationibus conferēdas. Nullam ibi inscriptionem reperi, cū illuc me contulissem cum nobili quodam è comitatu D. Noitelij. Totam illam insulam quam post Lesbum totius Archipelagi pulcherrimam existimo, ipsâ Chio non exceptâ, maxima ex parte peragravi, tum in D. Nointelij comitatu, tum solus, ut si quid rarum & sua curiositate dignum esset referrem. De sepulchro tamen illo *Bacchi* de quo mentionem facis nil audiui nisi de quibusdam monumentis lapideis quos mihi aiebant versus montem quemdam, dictum Coronum conspici, quæ religione aut superstitione potius nescio quâ nemo audet recludere. Nam quod ad arcum marmoreum quem memoras: is in scopulo tantisper ab insulæ continenti sub castro ea parte quæ Parum respicit remoto, extat: nec aliud omnes esse norunt quàm portam templi cuiusdam quod Bacchi potius quàm alterius Dei esse crediderim, cuius disiectos la-

pides stupendæ molis marmoreos vnâ
 cum totius ædificij Ichnographia, om-
 nes admirantur. Habes ergo, mi Sponi,
 totam de *Iove pecorali* historiam quo-
 modo se habet. Nunc ad Deos ignotos.
 Num de Deo *Archicrate* quidquam ac-
 cepisti? en habes hic Inscriptiones duas
 in quibus ille.



ΠΟΠΛΙΟΣ

ΤΟΥ ΤΡΩΡΙΟΣ

ΥΠΕΡ ΕΑΥΤΟΥ ΚΑΙ

ΤΩΝ ΙΔΙΩΝ ΣΑΡΑΠΙΔΙ

ΙΣΙΔΙ, ΑΝΟΥΒΙΔΙ, ΑΡΧΙΟ

ΚΡΑΤΕΙ ΔΙΟΣΚΟΥΡΟΙΣ

ΕΠΙ ΙΕΡΕΩΣ

ΣΤΑΣΕΟΥ ΤΟΥ ΦΙΛΟ

ΚΛΕΟΥ ΚΟΛΩΝΗΘΕΝ

Alia

ΘΡΑΣΕΑΣ ΔΙΟΓΕΝΟΥΣ

ΥΠΕΡ ΕΑΥΤΟΥ ΚΑΙ ΤΩΝ ΤΕΚΝΩΝ

ΚΑΙ ΤΗΣ ΓΥΝΑΙΚΟΣ ΤΟΛΛΑΣ

ΚΑΙ ΤΩΝ ΤΕΚΝΩΝ ΤΟΛΛΑΣ

ΚΑΙ ΚΟΚΥΤΟΥ ΤΕΚΝΩΝ

ΙΣΙΔΙ ΣΕΡΑΠΙΔΙ ΑΝΟΥΒΙΔΙ

ΑΡΧΙΟΚΡΑΤΕΙ ΘΕΟΙΣ ΣΥΝ

ΝΑΟΙΣ ΚΑΙ ΣΥΝΚΩΜΟΙΣ

ΕΥΧΗΝ

Priorem exscripsi ex marmore in In-
sula Delo ad radices Cynthij montis.
Libenter illud in navim transferri vo-
luissem, sed cum longè à littore abes-
set, non nisi cum labore & difficultate
summâ id fieri poterat. Alterâ vero ha-
bui ex parvâ columnâ aut cippo potius
qui in Capucinatorum Chiensium horto

locum habet. Archiocrati iungito *Herculem Catalaschium* quem ex psephismate quodam Deliaci in Patronis aliquis gratiam lato deprehendi. Verba excerpta ex psephismate quod longissimum est, & in cuius enucleatione oculorum penè iacturam feci, adeo exigui erant & oblitterati characteres, ita se habent.

ΑΝΑΘΕΙΝΑΙ ΔΕ ΑΥ-
ΤΟΥ ΚΑΙ ΕΙΚΟΝΑ ΓΡΑΠΤΗΝ ΕΝ ΤΩ
ΤΕΜΕΝΕΙ ΤΟΥ
ΗΡΑΚΛΕΟΥΣ ΚΑΤΑΛΑΣΧΗΟΥ
ΑΝ ΑΤΤΟΣ ΒΟΥΛΗΤΑΙ

Præterea *Iovem promontorialem* notavi ex quodam Smyrnensium numismate quod ex unâ parte Iovis caput exhibebat cum hac inscriptione ΖΕΥΣ ΑΚΡΑΙΟΣ, & ex alia proram navis cum hoc verbo : ΣΜΥΡΝΑΙΩΝ. Oro ut ista qualiacumque sunt æqui bonique consulas, atque si quod erratum benignè condones. Si quid his reponendum, aut si quid me opus habeas; literas tuas mihi reddet D.
Vaillant

Vaillant. Ἀλλ' ἐπεὶ δὴ ἡ ἀφεντία σὰς
 ἡξέρει ρωμαῖα, δέλω νὰ κάμω τὸ τέλος
 εἰς ὁπισθόκω μου, μὲ ἐτέτω τὴν γλώσ-
 σαν, καὶ νὰ βεβαιώνω σὰς πᾶς ἔχω μεγά-
 λην ὁπθυμίαν νὰ πτεύσῃς ὅπ' εἶμαι μὲ τὴν
 ὅλκω καρδίαν μου καὶ ψυχὴν μου.

Ὁλθ' εὐς οἰσμεν τ' ἀφεντιάσας
 Α. ΓΑΛΛΑΝΔΙΟΣ.

Dabam Parisiis 20. Octob. 1676,



RESPONSIO

VIR ERUDITISIME,

Duplici modo gratissimæ mihi fuerunt literæ tuæ, tum quòd tui notitiam avidè à me optatam vltro obtuleris, tum quòd nonnullas observationes ad obscurorum Deorum aras mihi communicatas esse volueris: pro vtroque favore maximas sum habiturus, in æternum gratias, imo & repensurus, vbi se præbuerit occasio. Iamque reum fatentem habes, in eo quod me erratum monuisti circa locum, ubi Iovis pecoralis inscriptio. Cùm enim de vtrâque crypta & Naxi & Antipari sermonem excellentissimi D. Legati auribus, memoriâque vsurpasssem, vtriûsque idæam apud me non probe distinctam pro una eademque habui. At feliciùs, faciliùsque ignotis tuis numinibus insuper propositis larvam detraham, neque enim si nihil
unquam

unquam de Deo *Archicrate* acceperim
 culpa mea est, cum is nusquam neque
 cultus fuerit, nec ea quod magis mi-
 reris bina epigrammata à te proposita
 ejus mentionem fecerint. Primum enim
 illud marmor Deliacum ipsemet oculis
 lustravi & schedis meis adjeci, atque
 distinctè perlegi ΑΡΠΟΚΡΑΤΕΙ non
 autem ΑΡΧΙΟΚΡΑΤΕΙ.

Harpocrates autem apprimè notus,
 inter Ægyptios cultus, ab eisque ad
 alias nationes Romanas Græcāsque de-
 rivatus: quem silentij Deum existiman-
 tes digito ad os appposito depingebant.
 Anubis autem & Harpocrates Sarapidis
 & Isidis filij erant, unde in hoc lapide
 ΔΙΟΣΚΟΤΡΟΙ vocantur, id est Iovis Fi-
 lij. Hunc enim Serapidem, inquit Sui-
 das, alij Iovem esse dixerunt, alij Ni-
 lum, & ex gemma antiqua pag. 29. jam
 notavi. Vnde non mirum est cum sit
 una eadèmq; Deorum familia, ibi
 conjunctim legi, & in altera inscri-
 ptione à te, Vir Doctissime, exscripta
 ΘΕΟΙ ΣΥΝΝΑΟΙ ΚΑΙ ΣΥΝΚΩ-
 ΜΟΙ vocitari, id est, eodem in templo
 culti simulque habitantes Dij. Sic &
 eos simul memorat Ovidius 9. Metam.

— cum qua latrator *Anubis*
Sandâque Bubastis, variisque coloribus
Apis.

Quique premit vocem digitoque silentia
suadet,

Sistrâque erant, nunquàmque satis qua-
situs Osiris.

Vbi penultimo versu Harpocratem dig-
 noscis nostrum, cui cum aliis eadem
 sacra fiebant. Vnde lapidi utrique A P-
 ΠΟΚΡΑΤΕΙ reponere non dubitan-
 dum est, sicut & in vltimo ΕΑΥΤΟΥ
 pro ΕΑΤΟΥ quod nihil significat.
 De Hercule verò quem *Catalaschium* di-
 ctum putas, nec dum constat, id enim
 marmor Constantinopoli perlustrans,
 sic legebam attentius intuitus ΕΝ
 ΤΩ ΤΕΜΕΝΕΙ ΤΟΥ ΗΡΑΚΛΕΟΥΣ
 ΚΑΤΑ ΛΑΣΧΗ .. ΟΥ ΑΝ ΑΥΤΟΣ
 ΒΟΥΛΗΤΑΙ, ita vt illud ΚΑΤΑ ni-
 hil aliud esse videatur quam *iuxta*, vt
 denotet locum iuxta quem templum
 illud Herculis positum erat, nec si cog-
 nomen Herculis fuisset in sequenti hu-
 ius templi repetitione omitteretur. ΚΑΙ
 ΣΤΗΣΑΤΩΣΑΝ ΕΝ ΤΩ ΤΕΜΕΝΕΙ
 ΤΟΥ ΗΡΑΚΛΕΟΥΣ ΤΟ ΔΕ &c.

Iupiter autem *Acræus* & alij plures
 ignoti

ignoti Dij à me in nummis observati
 sunt : sed lapides modo me relaturum,
 Iovem lapidem juraveram. Nec libris
 ignotum est *Acræi* cognomen , siqui-
 dem Iunonis *Acrææ* quæ erat in Pro-
 montorio Græciæ adversus Sicyonem
 apud Titum Livium lib. 32. & Iovis
Acræi itidem in Græcia apud eundem
 authorem mentio habetur. Nec statim
 istud *Acræi* cognomen , intelligendum
 est de templo in aliquo promontorio
 sito : nam & ipsemet Pausanias Iuno-
 nem *Acræam* memorat in arce Argolica,
 quæ longe abest à mari. *Ἀνιόνταν τὲ ἐς*
τὴν ἀκροπόλιν , ἔστι μὲν τῇ Ἀκραίᾳ ἥ ἐστι τὸ
ἱερὸν. Nec mirum ἄκρα enim antiquis,
 sicut & nunc recentioribus Græcis ἄκρῃς
 non tantum promontorium indigitat ,
 verum etiam & cacumen & angulum :
 quod Amasæum Pausaniæ interpretem
 fefellit , qui hunc locum authoris sui
 Latinè reddens , *ἰσθμὸν μὲν καὶ ὅσα ταῦτα ,*
δικάσανται ἔθ' πασιδῶν , *τὴν δὲ ἈΚΡΑΝ*
ἡλίῳ δόντω τὴν ὑπὲρ τῇ πόλει sic ait, qui
 cum *isthmum* *Neptuno* , *Soli vero* pro-
 montorium , quod urbi imminet, adjudi-
 cassæt, &c. Cum dicere debuisset *montis*
cacumen quod urbi imminet , videlicet
 mo ntem

montem illum ubi postea arx Corinthi
 fabricata est , quæ ideo *acrocorinthus* .
 alias audit : sicuti & Athenis arx vertici
 monticuli imposita *acropolis* vocabatur.
 Sed in re tam planâ diutiùs non immo-
 tor. *δε μίλω πειρασότερον , μινε κάμνω τέλος ,*
ὡδ' αἰγῶντας τὸν θεὸν καὶ δώση τῆς ἀφενλίας
σας πόλλες χρέους , καὶ οὐλα τὰ δελήματα σας
ὅσον ἀξιῖθ' εἶσαι καὶ ὅσον ὀπδυμῶ , διὰ πῆμας
πάντα μετὶ καρδίαν ,

Τῆς γεγραμμένης αἰθηνλίας σας

8. Nouemb. 1676.

Ταπεινώτατ' Δελεύτης καὶ Σκλάβ' Ὁ
Γακόβ' Σπών , ἰατρὸς .

*Ex Epistola D. Sibon in Suprema
Aquensium Curia advocati.*


Missa est ad me jam urnula fictilis
ex urbe Antipoli (*Antibe*) quæ
ibi reperta in lapideo sarcophago , su-
pra stantem æream laminam habebat,
hisce characteribus inscriptam.

VIGILIA	METIA
MASSÆ	FILIA
MARTI	OLLOVDIO
V. S. L. M.	


Si quid poteris divinare quæso ut
mihi communices &c.

Resp. Vigilia Massæ filia , A enim
aliquoties sic A Sculpi in inscriptio-
nibus observavi , Marti Olloudio
ignotorum nostrorum Deorum non in-
grato comiti *votum solvit libens* meri-
tò. Quid enim illud Olloudij cogno-
men sibi velit , ignoro , nisi forte
ab ὄλλυμι quod est *perdo , destruo.* Mars
enim

enim humani generis *destructor* merito vocaretur. Sicut è contra Mercurius, Æsculapius, Iupiter conservatores, restitutoresque audiunt, ut in hac brevi inscriptione ad sinum Corinthiacum, in ruderibus cuiusdam urbis à me repertâ, loco πεντάγυι vocato.



Simili pacto Apollinis etymon tradit *Servius*, ab ἀπόλλυμι *perdo*, minùs fortè ad propositum, de quo Consule Vossij etymologicum.



Ad inscriptiones,

II. ^{am} IOVIS TARANVCI.

XXXII^a MATRVM GERVDATIARVM.

XLII^a NEHALENNÆ.

Tractatū tuum, mi Sponi, de Diis ignotis avidè perlegi, cum autem quid à me observatū fuerit tibi notum facerem obnixè rogaveris, lubens meritòque præstabo.

Galli ovem suam *Taranis* sive *Taramis* nomine insigniebant, illique victimas humanas immolare solebant, teste Lucano.

*Et Taranis Scythia non mitior ara
Dianæ.*

Inde petittum videtur, Iovis *Taranuci* epitheton, quem fortè *Arria Successa* ex Gallia oriunda in Dalmatia venerabatur.

Dominus Bernardus nobilis eruditissimusq; Anglus Iovem *Taranucum* dici censebat pro Tonante, eo quòd vox *Taran* in partibus Britannia australibus tonitru significet, atque in Dalmatiam ex veteri Lingua Celticā transiisse hanc dictio-

ā

nem,

nem, nisi malueris Celtas aliquot
in celebri illa in Græciam & Asiā
transmigratione illic hæsisse.

Nymphæ sive matres *Gerudatæ*
pag. 54. meo quidem sensu erant
urbis *Gerundæ* quæ nunc etiam Gi-
rona in Catalaunia, tutelares Deæ;
quamvis enim hæc ara in Provin-
cia extet, nil me locorum distantia
mover, nec absonum vlllo modo
videtur Provincialem aliquem vel
Catalaunum inibi commorantem
Catalaunenſi numini votu solvere,
sicuti nemo iam miratur Gallum
Italumve aliquem se Divo Iacobo
Compostellæ devovere.

Deæ *Nehalennia* epigrammata
quæ refers non reperiuntur in Bri-
tannia, verum in *Zelandia* ad insu-
lā *Valcheren* tribus leucis ab Mil-
deburgo. Sed returbavit vox Britā-
nicianus. Minutolius noster Græcæ
linguæ Professor eruditus, qui in
hac ultima vrbe diu cōmoratus est,
mihi retulit se multoties ambula-
tionis ergò *Vestcapellā* profectum
esse, ibique sacellum aris huic Deæ
dicatis refertum animadvertisse,
quarum aliæ absque ulla inscriptio-

99

ne, aliæ vero inscriptæ. Nonnullæ
imaginem Deæ insculptam præ-
bent, eaque sedens exprimitur dex-
trâ canistrum fructibus onustum
gestans, sinistrâ piscibus plenum,
sicque erat illa,

Diva maris terræq; potens.

Totâ autem illâ regiunculâ aræ
inscriptionesque istæ ita obviæ sūt,
vt vix domus aliqua inter Medio-
burgum & Vestcapellam iis careat,
veluti in pago Steenhove sequens
hæc

DE AE NEHALENNIAE
SERVATVS THERONIS

FIL.

filius

Hæc habebam proponenda, in-
terim vale, méque amare perge,

Tuum *Jacobum Flournoy.*

Ex

*Ex Epistolâ Viri Illustrissimi
Dionysij Salvagnij Boëssij, in supremâ
Fisci apud Delphinates curiâ Pri-
marij Præsidis, ad authorem.*

M Armor antiquū in villa mea
nomine Vonrey possideo, de-
cem ab hinc milliaribus, in quo
hæc inscriptio legitur,

MERCVRIO AVG.

ARTAI O

SEXTVS GEMINIVS

CVPITVS

EX VOTO

Erutum fuit ex agro pagi Bea-
nerissant, in viâ quæ Lugdunū ten-
dit quatuor ab hac vrbe leucis, ibi-
que supersunt templi cuiusdam ru-
dera vepribus obruta, hodiéque
locus ille *le Til* sive Tilia vocatur,
eo quòd ante aliquot annos insign-
nis ac perantiqua tilia illic visere-
tur,

tur, sicuti veterum ethnicorū mos erat arbores iuxta Deorum delubra collocare. Eandē inscriptionem me apud Gruterū legisse memini, verū is eam Viennæ citat ad Divi Petri, vbi nunquam fuit. Non dubitarem autem sex leucis ab Lugduno distantem pagum Artas huius Dei denominationem suppeditasse.

Egregium Dei Sylvani epigramma quod pag. 19. profers, iam mihi ante triginta annos communicaverat defunctus Episcopus Genevensis; sed tertio versu legebat *maximas*, non autem *musicas*, quod autopsiâ certiùs affirmari posset.

*Viri eruditiss. A. Galandij
Epistola secunda.*

SI redditæ tibi fuerint, mi Sponi, literæ quas VVhelero tradidi, animadvertere potuisti prævidisse me quæ de Archiocrate responsurus eras, quanquam enim sic legisse me sim certus, nolim tamen negare id vel sculptoris erro-

re pro ΑΠΟΚΡΑΤΕΙ utrobique excidisse, vel linguæ quodam vitio, fortè aliquando ΑΡΧΙΟΚΡΑΤΕΙ pronunciatum fuisse. Ad alia propero; Non mihi in mentem venerat, sicut tibi, vocem ΔΙΟΣΚΟΥΡΟΙΣ referri debere ad Anubidem & Harpocratem, ut pote Serapidis sive Osiridis filios, quem antiqui pro Iove habuerunt: censebámque Castorem & Pollucem designari, qui ab omni ævo tali gaudent nomine, nec aliud adhuc dum mihi persuadere possum. Et si enim Plutarchus tractatu de Iside & Osiride asserat Anubium Osiridis ac Nephtys filium esse, illegitimo quidem conubio, cùm Nephtys soror esset Isidis legitimæ Serapidis uxoris & coniunx Typhonis, Harpocratem verò Osiride & Iside natum esse, nihilominus cùm nullum apud aucthores exemplum suppetat, quo constet par istud Deorum ΔΙΟΣΚΟΥΡΟΙΣ vocitatos fuisse, veterem vocis illius significationem retinere satius mihi videtur.

Accedit ad hoc quòd cùm Delos

fit

fit insula, fieri potest ut qui inscriptionem illam posuit, votum aliquod Castori & Polluci solvere debuerit, utpote nautarum & navigantium protectoribus Diis. Quod verò Iupiter atque Serapis vnum & idem numen sint, præter invictas quas attulisti rationes hoc addā me Luliæ Domnæ Græcum nummum Smyrnæ comparasse quem Thesau-
ro regio addidi. Is in averfa parte Clazomeniorum nomē inscriptum habet cum Serapidis typo, eodem prorsus habitu ac Iupiter, nisi quod ΠΗΧΥΝ sive modium capiti impositum habeat.

Canon cuius pag. 50. meministi nihil ignoti recondere videtur. Est enim viri alicuius nomen proprium scilicet Artali illius liberti, veluti & subsequēs servus Pasiclenis nomine venit. Vale.

Responsio.

BInas à te accepi literas, vir eruditissime, meque tibi ideo non parum devinctum fateor, quod tuas
ā 4. observa

observationes mihi tradere pergas.

ΔΙΟΣΚΟΡΟΙ certè vocabantur ,
Castor & Pollux , & eos intelligi
in Deliensi marmore non admo-
dum renuo , verùm tamen quòd
epithetò istud aliis quàm ipsis non-
nunquam tributum fuerit , est mihi
præ manibus non contemnendum
argumentum. Inscriptionem enim
vidi, in qua Cabiri etiam Dioscuri
appellantur.



*Venetis, in Palatio Grimari,
Ex Græcia allata.*

ΓΑΙΟΣ ΓΑΙΟΥ
ΑΧΑΡΝΕΥΣ ΙΕΡΕΥΣ
ΓΕΝΟΜΕΝΟΣ ΘΕΩΝ
ΜΕΓΑΛΩΝ ΔΙΟΣΚΟΡΩΝ
ΚΑΒΕΙΡΩΝ ΕΝ ΤΩΙ
ΕΠΙ ΔΙΟΝΥΣΙΟΥ ΤΟΥ
ΜΕΤΑ ΛΥΚΙΣΚΟΝ
ΑΡΧΟΝΤΟΣ ΕΝΙΑΥΤΩΙ
ΙΔΡΥΣΑΤΟ

Priusquam eam oculis usurpas-
se, dubitavi num forte à descripto-
re omissum esset ΚΑΙ, ut legeretur
ΔΙΟΣΚΟΡΩΝ ΚΑΙ ΚΑΒΕΙΡΩΝ:
verum non aliter sculptum est ac
iam exhibuimus.

Quidā asserebāt Cabiros esse Vul-
cano satos: alij, verò, inquit Stra-
bo,

bo Iovis & Calliopes filios esse, nec à Corybantibus differre. Fortè autem Dii Magni vocabantur quòd eorum ira inexorabilis esset, ut ex Pausaniæ Bœoticis colligere licet. Sicuti ergo Cabiri Dioscuri vocabantur aliquando, utpote qui Iovis filij non secus ac Castor & Polux censebantur, pari ratione Anubim & Harpocratem ita nuncupari non absurdum est.

Cæterùm ad inscriptionem tuam Chiensem, obortus mihi nuper scrupulus, circa Deorum istorum titulum qui ΣΥΝΝΑΟΙ & ΣΥΝΚΩΜΟΙ appellantur, quid scilicet sibi velit vltima vox ista, & an non potius legèdum ΣΥΝΒΩΜΟΙ, *ad idem altare culti*, quemadmodum ab antiquis usurpatum est.

De Canone quæ observaasti, equidem videtur fuisse servi illius nomen, quanquam omninò aliena à nomine proprio sit vox ista.

Tritia quam inscriptio XXXVII exhibet, mentionem fieri apud Pausaniam repperi, ubi de Tritia vrbe Achaicâ hæc insit. Alij, inquit, à Marte

„ Marte tradidere Tritiam Trito-
 „ nis filiam compressam fuisse,
 „ Minervæ Sacerdotem dum virgo
 „ esset: Melanippum Marte & Tri-
 „ tia natum urbem condidisse, & à
 „ se auctam de matris nomine ap-
 „ pellasse. Ibidem Marti & Tritiæ
 „ rem divinam facere solemne ha-
 „ bent. Vnde conijcere est Vibium
 Longum huic Deæ votum solven-
 tem fuisse origine Græcum, in par-
 tibus illis Galliæ commorantem, vel
 saltem huic innotuisse viro Deam
 Tritiam, sive fuerit in Achaia dun-
 taxat culta, sive etiam ex Græcia in
 Galliam transmissus fuerit ipsius
 cultus.

Occurrit mihi Reinesij epistolas
 versanti, Iuno cum duobus insoli-
 tis epithetis. IVNONI STY-
 GIAE CRESCENTINA
 MATRILIA CVM FIL.
 SVO V. S. L. M. & IVNONI
 PATVLCIAE T. FABAT-
 IVS TABVLARIVS
 OST. ET PROCVRATOR
 FISCIPATRONVS COL-
 LEG. LENVCVL. III. VIR.
 QVIN

QVINQVEN. D. D. Hæc
 Ostiæ reperta vbi Lenunculariorū
 erat collegium: verū illud Patulcij
 epitheton Iano dicatum erat, quia
 bello eius valvæ patebant & Clusij
 quia pace claudebantur: vnde Ovi-
 dius, lib. primo Fastorum.

*Inde vocor Ianus, cui cū Cereale
 Sacerdos,
 Imponit libum farræque mista sale.
 Nomina ridebis, modo nāque Pa-
 tulcius idem,
 Et modo sacrifico Clusius ore
 vocor.*

En aliam elegantem inscriptio-
 nem ad Deos nostros pertinentem,
 ex schedis Ligorij, ut eam refert
 manuscriptus codex Claudij de Ba-
 garris celebris olim antiquarij, in
 qua *Fortunæ Barbatae* mentio fit,
 subque viri barbati dextrâ temonē
 tenentis habitu sculpitur: sic autem
 se habet.

FORTVNAE BARBATAE

S A C R.

L. AVRELIVS MARCELLIANVS

A V G. LIBERTVS EXCERPTOR

V. S. L. M.

Erat ergo Fortuna virilis , non
 secus ac Fortuna muliebris. Dij
 enim ut quibusdam placet utrius-
 que sunt sexus : quod præcipuè
 de Luna observatur, quæ aliquando
 in nummis habitu virili exprimitur
 tuncque Deus Lunus audit. Sic Ve-
 nerem masculam statuæ quædam
 exhibent, vetusque Poëta Calvus
 confirmat.

Pollentemque Deum Venerem.

Sed hæc notiora , quàm vt per-
 sequi debeamus. Vale ac Fave.

A. Gallandij Epist. 3.

NOn me mediocriter turbavit
 epistola tua vltima, ob eam
 quam profers Palatij Grimani in-
 scriptio

scriptionem, ut enim ingenuè farear, mi Sponi, si Cabiros Dioscuros vocare liceat, vt ex eius textu colligere verisimile fit, quo pacto authores antiquos conciliabimus ignoro. Etenim iuxta Hesychij sententiam Cabiri sunt Vulcani filij. Hæcque ille ad vocem κάβειροι. πανὺν ὃ πμῶνται οὗτοι ἐν λήμνῳ ἄς Θεοί, λέγοντι δὲ τῇ Ηφαίστου παῖδες. Quod non nisi probatorum authorum testimonio fultus affert, inter quos recensendus Strabo, qui Casmilum vel Camilum vnum ex istis Diis Vulcano & Cahirâ satum esse ait, alios verò tres (in vniversum enim quatuor erant) ab dicto Casmilo genitos esse, cum tribus Nymphis Cabiridibus. Secundum ergo hanc auctoritatem non erant Iovis filij. Audiendus adhuc scholiastes Apollonij Rhodij, in suis ad primum librum scholiis: eorum illic nomina ex antiqui authoris fide recenset. Τέσσαρες ὃ εἰσὶ τὸ ἀειθμὸν. Ἀξίερος, Ἀξιόκερσα, Ἀξιόκερσοι. Ἀξίερος μὲν ἐν ὄρεϊ, ἡ Δημήτηρ. Ἀξιόκερσα ὃ ἡ Περσεφόνη. Ἀξιόκερσοι ὃ ὁ Ἀΐδης. ὃ ὃ Περσε-

σθέμεν ὁ Κασμῖλος Ἐρμῆς ὄν, ὡς ἰσχυρῶς
 νομισθῶν. Ita ex iis quatuor so-
 lus Casmilus Iovis filius erat, si pro
 Mercurio accipiatur. Verum enim
 verò, cui fides magis adhibenda est,
 Dionysodoro, an Acusilao apud
 Strabonem, dum Casmilum istum
 Vulcani filiū affirmat? Etiam si au-
 tē hunc pro Mercurio sicque Iovis
 gnato agnoscere animus esset, an
 ideo alij quibus Iupiter parens non
 est Dioscurorum titulum merentur.

Circa alterum dubium mihi faci-
 lè persuadeo excidisse vocem ΣΥΝ-
 ΚΩΜΟΙ pro ΣΤΝΒΩΜΟΙ, prior
 enim nihil aliud significare posset,
 quàm comessationum socios, quòd
 nihil ad rem nostram.

Ad titulum matris Deūm ΑΓΓΙ-
 ΣΤΕΙ pag. 36. symbolam meam
 conferam. Itaque dubito annon
 sculptum sit ΑΓΙΣΤΕΙ sive ΑΓΙ-
 ΣΤΗΙ: nam nil moror ultimam
 syllabam ΤΕΙ: Obuia enim est
 diphthongus ΕΙ pro Η. Illa au-
 tem vox ΑΓΙΣΤΕΙ nil aliud ef-
 fet apud me, nisi ΣΕΒΑΣΜΙΑΙ.
 Habeo mihi hac in re authorem

Hesychium, qui admodum fruetur in vocibus ἀγίστην & ἀγίστηα. Priorē ita exponit σέβαν, ἀγνέαν; posteriorem verò σέβε^η. Vtraque autem vox non aliunde, quàm ab ἀγίστης cuius foemininū ἀγίστη. Suidas huic opinioni non adversatur in vocibus ἀγιστεύαν & ἀγιστία. Verūm dum Pausaniā evolvo, is mihi difficultatis ambages recludit: paginā enim Aldinæ editionis 174. narrat de Agdistide & Atti fabulam: cū verò mihi notum esset, hæc eadem ferè ab aliis Rheæ seu matri Deorum tribui, ad Hesychium confugio in voce Ἀγδίστης, ubi ille rem omnem aperit: Ἀγδίστης, inquit, ἡ αὐτὴ τῇ μητρὶ τῶν θεῶν. Ipse etiam Pausanias non obscurè eandem esse cum matre Deorum indigitat, quandoquidem à Dindymene matre aliam non fuisse ἀγδίστην innuit. Itaque non dubita, mi Sponi, pro ΜΗΤΡΙ ΘΕΩΝ ΑΓΓΙΣΤΕΙ lege mecum, ΜΗΤΡΙ ΘΕΩΝ ΑΓΔΙΣΤΕΙ. Vide totam historiam apud Pausaniam loco citato. Strabo de eodem nomine nō conticuit lib. 10.

lib. 10. ubi varias matris Deorum
 appellationes recenset. Nam cer-
 te quamvis illic scribatur Α^{ἱεστν},
 optimè Casaubonus notavit legen-
 dum esse Α^{ἱεστν}, ex Hesychij tex-
 tu supra laudato. Sed vir ille aliàs
 diligentissimus Pausaniam de Ag-
 distide eâdem non inspexerat.

Pag. 63. Vocem ΦΡΗΤΟΡΣΙΝ
 in inscriptione Græcâ de Deo Eu-
 melo, interpretatus es tribuum
 magistris. Verùm, pace tuâ dixe-
 rim, alia est expositio investigan-
 da: siquidem ΦΡΗΤΡΙΑ sive
 ΦΡΑΤΡΙΑ tribum latine non
 significat, ut pote cùm sit tertia
 pars Tribûs siue φυλῆς. Φρατεία, in-
 quit Suidas, ἐστὶ τὸ πρῶτον μέρος τῆς
 φυλῆς. Il vero qui ex eadem erant
 Phratriâ φράτορες seu φρήτορες voca-
 bantur, teste eodem Suida, qui
 prioribus verbis hæc addit, φρά-
 τορες ὅ οἱ τῇ αὐτῆς φρατείας μετέχον-
 τες. Pollux etiam huc facit lib. 3.
 cap. 4. cùm ait: καὶ τὸ σύστημα φρητείας
 οἱ ὅ καὶ ἕκαστον, φράτορες. Societas
 equidem phratria, singuli vero phra-
 tores: Hæc enim nomina è Græcis
 latina

a/ latina facere mihi potius est , cum
 nullø sint meo iudicio ; quibus ,
 commodè efferri possint. Notan-
 dum verò tum Phratriam tum
 Phratores hoc sensu referri tan-
 tum ad tribus Athenienses. Verùm
 & Phratria & Phratores aliam sig-
 nificationem ab illa diversam ob-
 tinent. Audi Hesychium φρήτρα &
 φρήτρα φρεγρία (corrigo & lego
 φρεγρία) συγγένεια, πατρικὴ γενεά &
 in voce φράτρες, post allatam prio-
 rem significationem , subiungit
 συγγενῆς. Suidas similiter idem
 scribit , φράτρες ὅ τῃς συγγενῆς κα-
 λῶν. Ex his colligere est , hanc
 postremam significationem priori,
 in inscriptione de qua agitur , an-
 teponi debere.

Restat ut videamus quomodo
 propriâ dictione latinâ exprimi
 valeat. Nodum hunc nobis scitè
 & ad rem solvet Cicero in topicis.
*Gentiles , inquit , sunt qui eodem in-
 ter se nomine sunt.* Vides hic idem
 Eumelidarum nomen φρήτρεσσιν illis
 convenire. Itaque abundè consta-
 te mihi videtur veram huius in-
 scriptio

scriptionis interpretationem hanc
 esse : *Eumelum Deum patrium* (pa-
 ternum etiam ritè dixeris) *gentili-*
bus Eumelidarum , Tiūs Flavius
Pius curator posuit cum Flavio filio.
 Atque Eumelum magis placet pa-
 trium, quàm Patrensem dici, quāvis
 credam hunc Eumelum eundē esse
 cum eo quem Pausanias, non Stra-
 bo (qui error typographi tui est)
 Patrensem fuisse conditorem affir-
 mat. Nec abs re alienum est , fieri
 potuisse ut illa inscriptio Pâtris ali-
 quo casu Neapolim transvecta fue-
 rit, aut certè Pius ille iure quodam
 hospitij cum Eumelidis qui Patris
 forsan commorabantur contracto,
 Eumeli gentilis eorum statuam , ut
 eis gratum faceret , erexerit. Gen-
 tilem Eumelum voco eodem sensu
 quo Tullius , quæst. Tusc. l. i.
 Tullum ex septem Regibus unum,
 suum gentilem vocat , ubi agit de
 Pherecyde , de quo ait : *Antiquus*
sanè, fuit enim meo regnante Gentili.

Vale.

Nicolai

*Nicolai Ben I. V. D. & Academici
Dodonæi, Epistola altera.*

QVandoquidem, Vir Clariss.
Musarum fercula quibus gau-
deo delibare dedisti, priorémque
epistolam meam & quæ de Iove
Cingiduo excogitaveram in lucem
dedisti ac nonnulla dicere & dictis
addere commonuisti ad inscriptio-
nes tuas quas iterum percurri hæc
referre audebo.

Proximos qui in Inscriptiōe
XXIII. recensentur referri censeo
ad Penates, quorum proximitas fa-
miliaribus inest, qui tutelares do-
morum, patriæ domesticique vo-
cantur: Vnde Cicero de natura
Deorum Penates illos dicebat qui
penes nos sunt, vel non longe ab-
sunt ab hac vitâ, seu quia penitus
insident. Quinam ideo nobis pe-
natibus proximiores?

Hercules Ponderum. Inscr. XXV.
fortè sic dictus quòd cælum susti-
nendum Herculi ab Atlante datum
fuerit:

fuerit , quia Hercules ab eo res
Astronomicas & stellarum motus
didicerat. Octavius Strada nummū
ni fallor Marci Aurelij refert , in
quo Hercules Zodiacum & vasti
orbis molem sustinet.

Inscr. XXVI. *Herculis Somnialis.*
Somnialē Herculem reperio , qui
somno expèrgefactus latrones cla-
vâ interfecit, in cuius honorem
erecti sunt Pinarij & Potitij Sacer-
dotes. Somnialem etiam Herculem
invenio in pugna Pygmæorum,
vnde Alciatus cecinit ,

*Dum dormit, dulci recreat dum
corpora somno, &c.*

Sed meliori sententia somnia-
lem perpendo Herculem qui ægro-
tis bona ac saluberrima somnia
speranda dedit: mos ideo ægrotan-
tium erat ad ædē Herculis accede-
re, ut in somniis de ægritudine cu-
randâ monerentur.

Fortuna Torquatiana Inscript.
XXVIII. Duplicem fortunam in-
venio in Torquatis , unam in Caio
Manlio, deplorandam, alteram in
C. Nonnio Asprenate cogno-
mento

mento Torquati laudandam, qui aureo torque in ludis Trojanis et si lapsu debilitatus ab Augusto donatus fuit, ut refert Suetonius in Aug. sed arguendus Carolus Stephanus, qui fortunatissimum recenseret Valerium Torquatum, cum tamen nullus ex familia fuerit Valeriâ qui cognomento Torquati potitus sit.

Iupiter Acræus, cuius pag. 92. meministi, apud Smyrnæos colebatur, nam promontorium penes illos famâ dignum celebratur, quod Nautis & Mercatoribus illic negotia adimplentibus notum, corrupto sed vernaculo idiomate *S. Giovanni d'Acra* nunc vocatur. Ibi fortè delubrum aliquod Iovis antiquum erat, cum non minùs cæteris gentibus superstitione clari fuerint Smyrnæi, imò & primatu Asiæ à quo Asiarchæ ex templorum solemnitate Neocori S. C. permitte facti sunt, nec admiraberis si in arce Argolica, vel Megaris Iuno Acræa vocabatur, Hesychius enim Venerem & Dianam Acræam